



廣州府志

ル 5
1212
39



1212
39



廣州府志卷一百九

宦績六 國朝

姚肅規

湛上錫

王之正

陳志儀

高坤

沈權衡

福蔭長

周祚熙

李澐

李雲棟

趙衢亨

張元

劉士達

陳璠

曾良學

周士英

陳啟明

蔡璋

盧呈瑞

張仁 以上順德

廣州府志卷一百九

宦績六

施景麟

金英

查培繼

鄭向

李超

高遐昌

周天成

宋清源

史藻

彭人傑

仲振履

五福

藍山

關天培

陳連陞

子舉鵬
以上東莞

田家修

孫繩

俞麟

郭遇熙

梁長吉

李福培

蔡獻葵

以上從化

方以甯

戴應昌

楊燁

王授位

蕭大成

徐步汀

喬應庚

朱燮

謝鳴皋

楊宣

以上龍門

董日炆

冉存異

邵鳳起

沈澄

管一清

圖爾兵阿

傅其英

毛圻

張元愷

劉毓琇

荆埏

王啟宏

李上漢

閻廷弼

高猶寵

蔣觀昌

林朝開

余啟昇

王庭祐

以上增城

劉象震

龍之繩

蘇文耀

顧嗣協

魏標

王植

周懷濟

張甄陶

袁名器

陳兆熙

沈寶善

陳應聘

任光遠

羅俊

以上新會

國朝

姚肅規字欽甫陝西澄城人起家舉人以康熙二十二年令順德下車訪悉陋規害民者十剴切陳於上官請勒石永革

院司道府皆手批獎其清廉時兵燹頻仍民力未甦肅規謂

十室九空之餘為閭閻省一分便為地方培一分元氣非矯

情干譽也以縣志宜修補乃集諸紳議設局興事多本葉石

洞舊文今尚存

據康熙二十三年革陋規碑修

湛上錫號亦山河源人文行兼優康熙乙卯甲子兩科皆以

副榜貢有老親不欲詣國子二十七年訓導順德朔望率諸

生講

上諭月兩課藝出俸錢為諸生給紙筆供酒食始終不倦逾

年講學鳳山請業不問老幼及脩脯豐歉多賴指授以成官

舍弊壞風雨莫蔽布衣蔬食處之晏然秩滿遷諭海陽行後

諸生勒碑明倫堂以繫去思縣紳復建生祠曰湛公書院於

南門外置田供祀翰林鄭際泰為之記癸卯舉祀名宦

據祠碑修

王之正字午塘直隸通州舉人由陸豐調任順德剛斷任事明察濟之署役龍姓者慣探官意嚇詐人以擅威福每破產賂焉之正先訪知之甫下車卽痛予杖責革其役龍請托勢要求復不許自是諸役斂跡無敢橫肆者尤能隨事整頓某生讀書乏資用取其親叔衣物易錢以給叔遽以盜告正曰姪固不肖抑汝姪讀書而汝坐擁厚貲不之恤則汝尤非人令以十金子揮使出越宿遽復喚姪以銀至則缺其二矣詢知爲吏所攫責吏倍償之於是胥吏亦凜凜奉法順俗素奢侈每賽會迎神耗費動以千萬計正責其事於保甲令就地各召父老訓戒約束之摸魚歌者嶺外人謂之南音大率七字成文詞多淫褻之正就俗所尙倣其體自編孝弟忠信四詞日給斗米令瞽者循途唱之和以絃索聚聽動人風俗

大變尤喜作興士類以重幣延師而月爲之課貧者捐俸以給膏火政暇親至爲之口講指授出金帛獎其能文者乾隆丁卯將入都先設酒肴與諸生講學三日量其家各贈以賞而後行送者淚下尋遷嘉應州

據順德志修

陳志儀字漢威安徽石埭人以貢就選乾隆十二年宰順德以教育人才爲己任時縣學餽廩者百列弟子員者八百有奇號稱極盛嘗歷諸村堡見絃歌比戶秀民之待培植而成者非縣學可推而廣也爰是有義學之設先是前明邑令吳廷舉創設鳳山書院於鳳凰山下旣圯復修自左翼鎮移駐假爲公署邑紳請諸制府許遷而未果也志儀至延師權就學內奎文閣前麗澤書舍講地狹不能容履至是別闢義學於梯雲山麓堂房齋舍規模式煥卽梯雲書院也又以葛岸

堡在城西北相去五十里而遠與其鄉紳民籌設一區俾從者無虞跋涉陳村為縣適中最衝地初至即為延名宿借民祠為肄業所紳士感其意遂購地創西淋義學鄰近村有弼教與陳村接壤其人益加踴躍自請分一學志儀獎成之顏之曰化成皆捐俸為之倡紳民繼之而後勸梅氏兄弟士剛士仁者捐田給師生脩脯獎賞之費以持久遠順德志自康熙年三次續修後至此已閱六十餘年志儀慮文獻久而失墜乃尅期開局矯邑人自私其鄉之弊借才異地體例亦終留餘憾焉據順德志修

高坤字錦川順天昌平人乾隆二十年以舉人令順德廉潔自持寬猛相濟甫下車即留心教養凡有興革務從其大者城中鳳山書院為邑大夫育士所明令尹吳廷舉實創之

國朝康熙間移左翼鎮來駐屬弁假為公署邑紳請復之而逡巡如故坤促之會撤鎮令下遂倡捐修復制視昔增廣又以齋堂宇舍絃誦不敷復踵修焉先是縣初建九圖羅忠等上書請開縣後與三都人分輸公役一切夫馬雜派供自三都而九圖獨應官署舟車器物以逮鄉飲禮席春秋朔望祭費自萬厯後征夫無藝別設里長至

國朝丁勻於畝三都例供裁免而九圖應供如前民戶苦之坤病其不均申上官蠲除之永著為令數百年蠹政至是如釋重負百姓感德祀於崇報祠多士亦為設主祀鳳山書院

據文廟書院碑記及縣冊修

沈權衡浙之歸安人為人機警厯事久益諳練老成絕去意氣爰是官場有沈師傅之目其莅順也遇紳士出巨族可為

鄉里倡者負才智爲眾信服者見之無不折節下交掬誠相示紳士亦感其惻款事無大小咸助一臂於是令如流水無所扞格順德地分自南海趙宋以前皆僻陋鮮土民聚族居者其初率遷自他郡倣保甲遺意就中設黨正後以公費無出或緣事斥退缺不復充具文視之不復責以稽察地方事愈廢弛權衡至嚴行保甲使鄉各擇適中地建宇舍曰公約煙村若干戶以上設一人長之曰保正先選於縉紳而後及年老有德望者以姓字呈之官訪查不謬則木鐫某鄉某族戳記給之得執以司鄉事責以攻匪保良官如所請行遇小錢債及口舌嗔爭保正者各就約親爲排解不使成訟或繫久非命盜姦拐可招兩造勸處爲請銷案其章程詳密如此又自撰書楹帖與其訓誡語裝背徧致諸鄉懸諸約堂俾民

觸目知慊至今數十年猶有存者

據順德志修

福蔭長漢軍人任順德清廉素著數十年無可援比者每坐堂輒至日昃炳燭繼之待讞者無稽留日與紳士接一循讀書人本色未嘗以賢知先人而振拔孤寒雖權貴不肯少爲假借事事平情而出行所無事而聲績已四達矣奉

特旨改名福蔭尋遷太原知府卒於官

全上

周祚熙字緝齋江西南豐人由進士出令臺灣以德教變其悍俗值憂去士民合貲送之服闋嘉慶十一年任順德爲治一秉慈和甫下車擒巨匪百餘人境內肅清榮利得失視之泊如也履任未幾卽有海匪入境之事先時海寇張保煽亂大府下令封港賊無所得食遂竄入內河分掠諸村落僞檄索金拒之則撲岸焚間舍驅婦女以出嘉慶十四年七月初

一日郭學顯百餘艘逕泊紫泥海雞公石槩船掠碧江韋涌林岳別賊目亦圍烏州初十日復至疊石海越日抵橫岸又越日掠黃涌又越日掠扶閭至十三日去八月十六日石氏五百餘艘自新會轉順德至香山之潭洲二十日保掠沙亭越日至林頭又越日攻玕濬薄陳村不得入逐鄉壯至麥岸焚馬基頭又二日至赤花敗退是日學顯率八十艘駐雞公石焚三洪奇再掠黃涌攻簡岸不克轉攻槎涌二十四日保自馬基圍北海爲香山紳士陳寮采所敗順流至佛濬掠穀越日入西濬區友梅惟良友坤計退之二十九日再掠玕濬鄉勇周維登死之羣賊旣遊奕內河石氏守港口爲應香山令彭昭麟招夷船圍之亟促保出救至是羣賊悉退實十月初三日也官軍合圍於赤瀝角學顯援於濶洲不應僅而後

免學顯懼保圖己先降十二月保黨復闖入雞洲度歲逾年正月初三日登岸都司盧呈瑞率兵及鄉勇力禦之退時保亦勢孤自危紫泥巡檢章予之偵知之使醫者周飛熊往說遂投誠使領其眾出勦西路賊以次平焉當賊之始至也承平久民不知兵踰跟避縣城賊覬覦將謀襲入祚熙塞城北新濬而設備於縣東之江頭嘴築土臺守之皆入縣要害也城內皆鄉民多不能儻居則雜於道饑偶攫食市物守門者疑爲賊應祚熙爲之拊循安插夜每籠燈單衫草履巡街衢率五鼓乃還倉猝籌守備貲無出輕騎歷村落勸捐而鄉亦自爲設衛不能應焦勞無策盡出衣物遍質於長生庫馳請大吏鑄礮分被圍諸鄉一鄉未畢他鄉之告急者又至省調武弁以兵來供給不貲數月間顏色憔悴而延接紳士商防

守計團練日不暇給幾於唇焦舌敝蓋自開縣後無倉皇至此者卒之四城安堵倉庫無恙比賊平而祚熙亦急求去矣

至今父老目擊其事者謂俎豆千秋不愧云

按龍廷槐敬學軒文集有周緝齋制義序云補順德甫下車擒巨匪百餘人設誠開導不肯鈞距爭長不肯迎合取巧與當世敢驚踔厲以詭進者異其洋賊攻黃連急祚熙畏縮不肯往典史王習勸之不從余夜入見以黃連破則腹背受敵禍不旋踵大府將以守禦弛懈登諸白簡首領難保即呼其家人傳集壯役護行及出城已不允又云閩儒闕冗不事適大府委謝事守楊楷來查訪余約偕進署懲愚移礙合碍於前說無憑始允云兩文先後互異頗起疑訝按序稱不肯鈞距爭長異于果驚踔厲意與紀事之云畏縮闕冗正同大率祚熙平素為人遇事詳慎黃連之役官行則城無主者故聞報尚稍遲疑迨經力勸即決意奮出其後雜洲之戰則不獨身在行間且日數往返無所憚勞蓋當盜船駛入猝出意外諸鄉同時戒嚴每有立行稟件必俟親決未可遠離雜洲近在咫尺間肩輿數刻可達黃連則去城數十里雖道內河而賊之開波遊船早已四出紛擾官為萬眾繫命行止須自有機宜不能責以膠柱調瑟也不然祚熙果執意不前為紳士者遽代呼其家人傳役如牽傀儡

備不容自主勢固窒碍况此時賊退無時祚熙方飛請大吏駐兵運餉分給各鄉使自得自為守禦區區一礮何足勤惜正以備守城之利器之未必無因先是祚熙以防盜首資團練意在集捐貲親歷諸村激勸顧當鄉自為守之時捐不時應縣紳近受責備此中不無意見當黃連之勸一時設詞相拒或亦有故而然初不料竟以是貽諸口實筆而載之也未幾李雲來辦善後時海疆綏靖較諸身罹巨創者勞逸奚啻天淵乃俎豆青雲在波而不在此今又歷之數十年至此而後公論昭著然則為

李雲字鐵橋浙之山陰人舉人起家嘉慶十八年任順德明

敏熟通吏治順德民畏履公庭十告不一詣審民有人城候

數月不見官者吏役遂其飽飫而後示讞期訊不得其緒則

留候他日三四反莫之決閹者復從而延擱之於是怨聲滿

四郊矣雲始至廉知其弊日出坐外堂懸牌招告者勿需期

自詣案牒陳雲口講手揮頃刻滿紙隱無不悉而事之層遞

曲折已如目覩不假集供而定判已令役持張署壁揮告者

使出閱必心折而去稍重者兩造集必以期畧詰兩三語卽下判如前遇曉辯卽痛詈之揭指其隱私揮令去且每謂汝不服盍試赴院司控此倔強縣令耶故雖以意見爲斷決示快民往往不能盡其辭然彼此率有責備卽負者亦心服其明輒不敢終訟尤嚴行保甲諸鄉添設堡鄉正各貳之每與語片刻卽知其良否他時攻保恆因其人爲疑信別准駁是以終其任保甲得實效舊習女子未嫁與鄰姊妹處謂之金蘭嫁則視夫如仇敵率數日返歲以時節至必食母之食強之則以死誓非嫁三五年成孕不守婦道也父母畏其輕生貽訟累亦卽聽之澣出有就輿前訴其子婦者初以爲瑣屑笑逐之去以語邑紳龍廷槐始暢悉其故自是凡有訴者亟逮其父兄至墨塗其面以辱之不以門第恕也一時民俗警

動以被迫橫死告遽令殮埋不詣驗婦女知徒死無益三十餘年來不復有自棄其生者皆澣力也城南尼假法事夜集少年僧偵知之空其室爲公舍井里肅然總督蔣攸銛保薦召對賜克食遷知惠州擢督糧道轉臬使未幾乞病歸據順德志

謹案澣位監司而宦績俱在順德故從縣志修

李雲棟字扶舉山西解州人由舉人以道光十三年權令廣州自道光十三年西潦盛漲桑園諸隄悉圯米值陡翔民無所得食省會設局令董理者遍召郡邑紳士捐集義貲市米賑濟廣管六縣皆間關以就順德去省會百里必由水達雲棟知民出必攜老稚婦女鄉渡不敷載將被淹溺且至省露處或爲變也於是以文復院司謂縣紳故好義不使輕去其

鄉請留捐於縣先以文告與諸紳約令有力者自賑其地巨族則籌諸公嘗撰爲程式俾畫一行之每堡自捐俸銀五十兩爲之倡諄切普勸鄉堡感其意量力足成之自始事迄終凡旬日必使人分詣諸鄉詢捐數少則再以書至旣臧事籍其出貲者爲請於上官題門獎焉是役也數百村飢民無一出鄉而人人胥得飽飫荒歉不足爲患者雲棟力也其他縣之捐貲省局者竟以勒捐入告煩

欽使來粵訊質縣紳優游事外雲棟若有先見焉有兄弟爭路者赴質雲棟曰若此來泊何地皆以實對曰然則何地不可同行而爭之乎悟謝去尋以循良調補番禺令遷綏猺同知雲棟生平務平情接物取古今格言切於行事者著作人編刻以教其子弟爲令亦舉以教民有誦之終身者

上全

趙衢亨字子鶴吳縣人嘉慶庚午舉人道光九年分發廣東候補知縣旋以親老告近十八年丁內艱服闋回廣東試用二十八年來署順德以二月四日抵任時當防夷後丁壯之散歸鄉間者多爲盜往往擄人勒贖不滿其欲有戕命者人懷惶恐衢亨下車卽親出搜捕延紳士指引盜藪獲巨匪立置之死匪黨聞風遠遁四境始安二十四日四鼓旋署覆試諸童猶以以生道殺民命題退入痰發暴卒蓋抵邑尙未匝月也先是衢亨於下鄉舟次撰捕盜條款十餘則擬自捐捕費千金爲倡惜所志未遂邑人痛之精講金石所藏極富考論閣帖釋文有卓識嘗刻翁氏蘭亭考

上全

張元字孕初江右人由吏員順治十五年任順德典史清慎自勉布衣蔬食凡堂行詞訟審判務得情實雜職例不受詞

偶有錢債小故必具番蚨以入為白米硃墨等陋規錙銖以較元痛革之上官聞而獎焉城內有鐘樓前令李按五山志林稱徐侯

圯已久邑令徐以修復事委元土木一無尅扣而督視始終

不懈故事令新至典史必備物賀元書儀目獻受數事鬻衣

物且稱貸足之尋轉粵西巡檢以去士民歛金賦詩裝帙追

送百餘里為贈元欣然曰吾西行展誦可忘飢矣其得民如

此據順德志五山志林修

謹案廣州府志名宦順德典史有兩張元皆為立專

傳一云南昌人萬歷中任而不著其字一云江西人

字孕初次在康熙四十六年新會令顧嗣協後今考

順德志萬歷朝典史四人各有年任而無張元別有

順治十五年任之張元賢良門有傳故陳志因之據

此當為一人府志籍貫誤分省縣兩存之耳府志前

張元亦止云清慎愛民委事虛公審鞫革陋規而已

今合之

劉士達浙江山陰人雍正元年任順德典史丙午歲飢士達

駕小舟沿鄉勸賑雖盛暑不少休富室感之競出粟施濟尋

轉凌江驛丞邑人思慕不置據阮通志修

陳璠江南人順治戊戌武進士康熙十八年來署鎮標中軍

遊擊為人善騎射身長有膂力戢睦軍伍時順德鎮乘水師

提督之後分中左右前後五營兵民雜居璠禁兵不得與閭

閭爭先是番禺謝厥扶奉尙之信命與吳逆和逾年之信反

正召厥扶抗兵不從與藩卒戰於疊石總兵祖澤清殺之子

昌與其黨李積鳳等挾殘兵亡入海據海陵島入劫新會順德水村大肆殘毀至是復騷擾境內村民告急時遼東許宏德為鎮聞賊勢張不敢出賊迫近城外璠請戰不許憤甚遂率所部舟師迎賊魚塘海賊偵知無繼者伏槳艇葦岸佯敗誘璠追入伏發礮如雨夾擊不能支兵皆梟水道會部下守備馮俊聞璠死戰急赴援相與執弓矢登陸從者不滿十人或勸之走奮曰逃將軍何面目見人惟有舍一死報

國恩而已殊死戰賊四集射殺數人與俊皆受重傷死時康熙十八年十二月十二日也事上得祭葬廕卹如例

據順德志修

會良學字超友縣之小里涌人少講韜鈴習海務值廣州多故謁左翼鎮馬應魁令署以水師守備凡遞運蠟書羽檄調度悉中機權授參將蛋賊周玉李榮就撫復叛攻破縣城良

學勦之統舟師力戰獲周玉餘黨盡散敘功陞副將丙辰吳

三桂別將馬雄寇新會良學奮勇堵禦扼江門要道康熙中

設復順德鎮薦以原官管遊擊事尋實授屢立奇功老解職

去

全上

周士英陝西榆林衛人康熙九年調順鎮左營中軍時山賊

李山官七糾集亡命千人潛渡九江流劫龍山諸村落士英

聞警馳約謝遊奕以舟師橫截九江河上斷賊歸路隨會陸

師追捕四日夜乘賊飢疲盡殲之片甲不返賊勢驟弱以功

進遊擊八月劉進忠以潮州叛勦之歿於陣事聞

賜卹典給祭葬費贈官廕子有差

全上

陳啟明漳浦人起自行伍積功官督標後營參將康熙十八年前游擊陳璠擊賊敗死遴員補其缺以參將調署順德中

營遊擊總兵許宏德本統袴子恇怯無能賊益驕肆倫教村近在城北賊謝昌攻圍焚劫極慘擲雉尾炬燒汛哨艦汛兵走還城賊乘勝追至北門石湖涌登岸恣擄掠老幼婦女相攜爭趨城城閉不得入民呼門大哭賊尾其後愈惶懼自相踐踏多死者啟明三叩軍轅請發兵不應怒眦欲裂大聲曰食祿爲將乃坐視百姓死賊手吾何以生爲遽擐甲持刀率兵五十人徑開東門出旋遇賊瞋目大呼當先突擊手殺十餘人當其鋒者咸碎賊披靡走直追至河下賊跳船遁首尾不能自顧謝昌僅以身免自後不敢窺伺村邑啟明扼腕曰使得一艦載礮追之當無噍類矣奪回擄口衣物令招民悉認還無敢匿者民大德之後奉制府調還肇慶原營民罷市挽留不可得則結彩鼓吹邀路傍簪花禮饗送至江濱哭拜

者數千人啟明亦揮淚交拜將別忽中營守備劉漢臣者跡至引纜截江索船械銀數且不貲不聽去民共奮然曰是在吾儕卽相隨還城闔城男女爭解腰纏脫釵釧頃刻如其數呼劉示之劉大慙次日復備禮如前送數十里而別據郝通志修蔡璋字秉鉞福建晉江人任江西水師總兵康熙十九年調鎮順德時廣州各縣經兵燹武備廢弛賊至如入無人之境焚掠屠殺慘不可言

朝議選威望素著者畀以海事責其剿賊知璋才可用加晉太子少保銜總兵以兼銜移鎮異數也先是璋自練精銳爲親兵皆百戰之餘所向披靡者至是疏請以四百人自隨抵鎮目擊情事知非大加懲創不能痛絕根株尅期治戰艦訓戎行備礮械嚴汛守信賞罰禁冒濫飭偏裨以下毋得擅離

船汎尺寸違者斬於是弁兵相戒奉紀律唯謹賊眾素易視官軍及是懾其威名不敢復犯營界民始欣欣慶完聚順縣號繁庶凡市廛津渡一切材物所出及墟集貿易所在舊有私抽名目曰納行錢曰買牌錢無則兵攫之訴之不直也璋按款爲之除革門外設大鼓兵有強索肩挑物或率意毆辱者許擊報立擒治日數擊數逮不厭民隱悉通初謝昌輩偵璋設備懼勦捕頗自防既久而懈居一載璋遽簡舟師出不意徑突海陵島覆其巢穴焚之積年村落之被擄者人無算載以巨舶牒還其家未幾逸賊復寇香山十字門乘勝平之海氛至是頓息事聞獎敘有差璋每出戰必親擐甲胄與部下同甘苦故士卒用命以武功顯而能禮士大夫識大義愛聽人讀書積勞成疾士民爲私禱者甚眾卒之日罷市巷哭

七日不輟海濱至今祀之

據阮通志順德志修

盧呈瑞甘肅西甯人由行伍積功歷欽州營參將來署順德協副將事嘉慶十四年十二月二十八日海賊張保以郭學顯背已投誠遣其黨復擾內河至紫泥海薄雞洲連檣老鴉岡下村民素務耕作方度歲稔聞警惶甚先是縣境雖回環內海而咫尺可達汪洋賊自板沙尾逕南排頭順流至雞公石數里至黃涌自大洲迄北海十三村毗接號險要紳民築兩臺夾大洲與雞公石相對置守苦無巨礮鄉勇守者莫可恃呈瑞營兵半防南海三水諸縣城中戒嚴留守城者不可多派以出所屬弁陳某者有膽勇得士心呈瑞素所器重令先兵駐雞洲會百督部聞縣警檄肇慶都司周永發以督標兵二百來駐防道雞洲村至是賊由海口撲岸村人隨陳拒

之伏兵潛上松路驟發連環鎗傷賊會呈瑞與縣令周祚熙亦聞報率所部至與陳合守要隘周視濱海形勢必築土臺自蔽而後可合軍士有進無退也于是村民踴躍趨工二十坊各分力合築半日臺成勇氣加倍賊未之知鼓噪直進呈瑞麾兵向攻礮斃一賊尙無退志村港故樹柵以巨木橫其空賊舟大者不得越易扒船循隙入潮退涯高呈瑞慮礮不中艇移諸涯下近水盡得力料賊將去柵且長驅進與村人約運石堵柵空人五百劬一時庭除道路悉移出頃刻填平賊知不可勝遂懈明年正月二日祚熙以所領三千劬礮來助轟碎賊目巨艦乃率眾揚帆遁去是役凡晝夜堵禦鄉勇死者三人而賊之傷斃者無算呈瑞力最多雞洲西南隔河距城近城因戒嚴祚熙往來其間足無停趾獎勵鄉眾賞恤

兵丁焦勞亦至矣越二年呈瑞擢黃岡副將賊之犯他村也乘不備突至登陸飽所欲即去獨于雞洲窺伺騎歲不肯遽舍者蓋據為巢穴則密邇縣城而十三村如在指掌也微兵力危者不獨一鄉矣故當時巡檢章予之駐大洲盡挈弓役以往而諸村亦各以壯丁來助守望也事平村人為位歲祀呈瑞祚熙及陳于公約而別祠死難陸進高蘇強盛李長義三人者于鰲山碧雲洞據順德志修

張仁字靜山三水之張邊人按通志作番禺人今從三水縣志永成傳父永成有

傳仁以雲騎尉起家清遠營遊擊嘉慶十九年濱江賊陳明安等誘人拜會請于大憲以計誘殺會匪六百餘名遷雷洲營參將道光七年署順德協副將事親督兩營備弁以下駕巡舟沿河緝捕獲盜無算時李澐王勳臣先後為令意氣皆

與投契民事有不便者輒言之令亦深信其為人言無不應
仁多參盜線厚給以資購賞曾不食言故人樂為用每以深
宵人靜忽起然燭炬傳集兵弁鼓掉而前初不知所向及賊
所而後分路圍搜往往全數弋獲無得脫者雖窮壤岐汊盜
踪最密之地皆訪獲焉優禮文士喜談藝能吟咏以餘事作
畫楚楚有致嘗招縣名士呂翔梁元狃巖倫諸人集署堂為
詩畫之會蓋少未襲宦時從師學為文詞摩挲久而愈熟當
時所賦韻語人多傳誦為美談云

據順德志修

施景麟字二麟浙江杭州人順治四年知東莞時土寇蜂起
近郊多被蹂躪景麟編查排甲丁口萬計一見即識其人有
妄冒者立斥之聞警率紳士守城晝夜不懈戎馬倥偬中時
集人士校論文藝明敏整暇一時稱之

據東莞志修

金英字劍耿浙江海鹽人順治十一年以感恩令來攝東莞
撫字勞來與民休息凡四閱月得替去攜壺漿送者自縣以
達番禺相屬不絕客有誇之者英謝曰此所謂霜雪之後易
見陽春耳其挹損如此

據東莞志修

查培繼字王望浙江海鹽人順治十二年以進士知東莞有
惠政尤加意學校士以文藝來謁者為之講授竟日不倦彙
集其課士文曰相見篇所成就人材甚眾一時科第多出其
門擢刑部主事歷刑戶兩科給事中轉江西饒九道致仕

全上

鄭向字蓋之山西洪洞人順治十六年以進士令東莞時軍
需孔棘向苦心經畫不以催科擾民民有構訟而不欲終者
輒遣之去其純質愛人多類此

據東莞志修

李超直隸曲周人恩貢康熙五年知東莞性剛直御下嚴明

邑五七都地僻遠歲賦悉蠹胥代納因緣乾沒逋負常多超廉得其情嚴繩以法一時稱便惜以艱去據東莞志修

高遐昌字菘園河南輝縣人康熙三十七年以進士知東莞有清操留心民瘼里胥挪移朦飾諸弊端剔除殆盡嚴東追呼之隸不得擅入閭閻聽民自輸納捐俸修學宮創義學調茂名縣歷兵科掌印給事中據東莞志修

周天成江南上元人由舉人雍正四年知東莞留心民瘼首革書算排年之弊以印冊分給各圖責本丁自書名及數催科無所容奸賦遂易集捐金倡修邑乘瘞遺骸禁聚博絕婢女巷遊均有可紀據東莞志修

宋清源江南元和人乾隆三十八年以廉州府同知攝東莞令政尚寬平未嘗妄笞一人邑大水民居多漂沒男婦流離清源捐俸顧舟濟難民空寺觀設廠城上以居之給糜粥薑湯日夜驅馳躬自撫恤費俸金三千餘兩凡活數千人是歲無斃於災者甫數月受代民至今思之據東莞志修

史藻字鑑堂陝西華州人進士乾隆五十六年知東莞廉明慈愛聽斷如流首革嚇索械鬪囂風一時豪猾屏跡邑到涌及西北城濠淤塞五十餘載捐廉倡浚仍置千金裕修補靖康場奉裁鹽田責民陞科力請上憲豁免民蒙其惠六十年復以同知攝邑篆三月清釐邊海沙坦捐設公車費政尤可紀嘉慶二年敘平苗功陞授肇慶知府卒於省邸邑士民間訃號泣往奠不絕於道據東莞志修

彭人傑江西廬陵人由附監生於乾隆五十九年知東莞甫下車卽問民疾苦邑舊有普濟院為棲宿疲癯老疾之所垣

圯窮民無依傑鳩工重建費金千餘悉自捐廉為之復設義學置義塚磬石道給寒衣凡有利於民者次第舉人咸頌焉知邑誌有資政治請邑中縉紳續修後以卓異遷去其普濟院義塚與綠蔭亭等記文皆傳誦焉據采訪冊修

仲振履江蘇泰州人嘉慶二十一年由進士調知東莞為政以猛濟寬莞俗民風强悍械鬪劫掠積案纍纍振履莅任遇爭鬪即督差役親到彈壓務獲首謀真兇置諸法鬪風為息聞有積匪即懸重賞飭兵勇以捕之差稍惰立予斥革羣匪屏跡境賴以安善屬文精於課士屆縣考登前列者多雋才念書院為育才地撥南新洲租壹千兩以增寶安龍溪兩書院膏火舉人趙鯨貧而廉介振募名造訪遇計偕贈金三百令上公車以卓異調知南海道光元年八月復署東莞值竹

溪一帶鄉村械鬪振履親率兵禁止喚集各鄉紳士曉諭令建竹溪義學以興文教咸感泣聽命紳民思其德立長生木主於義學以祀之至今猶追念不置云據采訪冊修

五福字嚮亭姓王氏漢軍正白旗人由內務府員外郎緣事降調捐縣丞分發廣東歷署雷州府經歷番禺縣丞道光三十年三元里以械鬪獄不可解總督委治之馳往諭以禍福民皆感泣事遂息自是遂知名咸豐三年委修韶州府城十二月代理曲江縣事四年禦賊有功八年補東莞縣先是五福父鍾祥嘗為東莞有政聲五福至思繼父志縣東鐵岡為劇盜所聚捕為首數人誅之行旅獲安邑有劉氏與駱氏鬪劉氏驅駱氏數百家去而據其產恃薦紳為援駱氏歷控不得直五福偵得其情調處之訟遂解有張其英者因抗糧拒

傷縣役已服罪或勸遂誅之曰官爲民父母民猶子也子弄父兵罪當笞耳責而釋之十年調署番禺先是英吉利入廣州旣罷兵洋人與官並處市井無賴倚爲逋逃藪五福獨持法治之無所避洋人怒一日至洋館議事洋人留之翌日羣酋列坐堂上請五福至不給座將挫辱之福叱曰和議中有云兩國官員相見以禮此何禮耶酋不能答復背酋而坐叱曰士可殺不可辱汝能殺我卽殺我恫喝何爲脫冠擲之羣酋氣沮一酋起謝將送歸而是時廣州人眾聚至二萬人於路設香案結彩亭張官清民樂燈籠洵洵將迎之歸賴廣州府李福泰調停勸諭遂不敢逞洋人復留之匝月旣知終不可屈乃禮送歸是時直聲震廣東巡撫耆齡以

聞同治元年遂補授廉州府調瓊州潮州再調高州署肇慶

卒於任年六十二五福性至剛遇事能以氣勝在潮州亦以

與洋人不合告退云

據采訪冊修

藍山大埔人乾隆三十年由舉人授東莞教諭端謹廉介以敦行力學勉諸生每月課口講指畫委曲詳盡終日無倦容

士風翕然以振邑中科名之盛實其功云

據東莞志修

關天培號滋圃蘇州淮安府人聖裔也以武生投營効力押運漕糧存陞太湖協副將擢蘇松鎮總兵道光十四年授廣東水師提督時洋人律勞卑窺伺虎門欲入穗城天培甫下車知虎門爲穗城咽喉第海口寥闊舊設礮臺不足資守禦遂咨商督院奏請添威遠靖遠鎮遠橫檔永安鞏固各礮臺並於橫檔中泓立排鍊二度控制洋船設誌椿知潮水之長消添水墊測礮口之高低凡籌海要需莫不殫精竭慮道光

十九年洋酋義律率洋艘攻虎門天培統戰艦在穿鼻灣轟以連環礮燃積薪以撞洋船洋船大潰奉

旨賞戴花翎給法福靈阿巴圖魯二十一年義律復糾合各國戰船數十號犯靖遠臺天培督兵死戰自辰徂申鼓音不絕力竭失援為飛礮所傷遂與麥廷章同日陣亡事

聞朝廷震悼

勅建昭忠祠諡忠節以騎都尉恩騎尉世襲罔替據采訪冊修

陳連陞湖北人前任三江協副將道光二十年調守沙角臺臺後原設重兵當道已撤去連陞製地雷礮練卒扼險防堵綦嚴是年洋酋伯麥領事義律統洋船數十號由臺後乘虛徑入連陞與子舉鵬督兵迎敵尋兵力不支洋船迫近發地雷礮不應連陞父子挺身陷陣殺數百人力竭同日陣亡奉

旨加總兵銜世襲雲騎尉給葬祭

勅入昭忠祠據采訪冊修

田家修鳳陽人順治時知從化縣時兵燹之後家修力為撫

綏安集流亡勸令開墾輕刑減訟殘黎以安據大清一統志修

孫繩臨淄人順治中從化知縣下車詢問疾苦上十事當事

嘉其議花山盤古諸盜流劫近郊請兵勦之降其渠魁七人

黨三百餘人賑給石槥漢田諸村流亡以治行薦去民立遺

愛碑據大清一統志郝通志修

俞嶙字仲高餘姚人順治戊戌進士康熙十一年任從化令

甫下車利興弊革時平藩欲開銀礦嶙止之有奸棍串營為害者立斃杖下值盜寇充斥設法守禦橫者捕殺之民獲安堵立月課以教諸生文風始振邑民祀之據張府志修

郭遇熙字駿臣新鄉人父士棟孝友端方學以廉洛關閩為宗遇熙登康熙乙未進士兄弟同居數十載迨析爨田宅盡讓與諸兄弟謁選授廣東從化知縣著有循聲擢刑部主事

卒據大清一統志修

梁長吉字謙六廣西涿城人康熙丁卯舉人四十四年授從化令捐俸置義學設公費在任五載興利除弊不可枚舉寓撫字於催科申教化於刑罰慈祥愷悌士庶德之卒於官崇祀義學據從化縣志修

李福培江蘇無錫人道光壬午舉人咸豐二年授從化令清操自勵四年七月縣屬錦崗地方賊甘仙等聚眾數千撲入縣城福培會營督率兵勇擊退先後殲賊六百餘人至九月間賊復至直撲縣城二十七日用大礮轟塌城垣即由缺口

擁入縱火焚燒福培督兵巷戰與典史趙應瑞及其隨任堂弟李性培皆身受重傷被焚身死寸骸無存現在尊經閣前

地中血影宛然入祀昭忠祠據采訪冊修

蔡獻葵南雄府保昌人康熙二十八年以歲貢任從化訓導端凝沉靜舉動不苟儉以自奉寬以待士雖貧薄義不受弟子之餽金有以束脯將者即請士共享之居恆以作文為事時訂數十篇請正於邑令郭郭服之贊譽不絕口居四載年九十四卒於官囊無一錢郭令率弟子曾鳳舉李士顯等數人捐資具棺殮買舟歸葬據從化志修

方以甯浙江蘭谿人由歲貢順治七年隨兩藩定粵授龍門縣時路溪塔嶺諸寇屠劫各鄉十年以甯請兵蕩勦强寇下山既平復移勦上山櫛沐行間以勞瘁病卒據龍門縣志修

戴應昌休甯人由進士順治十一年宰龍門年已八十矣政
尚寬簡勸民息訟喜文士訓誨不倦莅任三年士民相愛

府志

楊燁湖廣漢陽人順治己亥進士康熙二年授龍門令革濫
徵修廢墜葺名宦鄉賢祠新譙樓浚城濠門集諸生課藝年
饑設糜粥民咸就食山寇肆虐率兵深入紅溪李三岡寇逸
去邑賴以安祀名宦

據郝通志修

王授位遼東廣甯人正黃旗監生康熙四十三年授龍門令
初謁文廟仰見傾圮即整修之山發蟄水壞民居授位飢
者食之死者殮之建義學人知率教練鄉兵人厲義勇蒞任
九年陞福建邵武同知祀名宦

全上

蕭大成字敘九號儀齋一號上村雲南建水舉人康熙五十

一年知龍門縣嚴治姦宄留心民瘼除積弊省差役絕苞苴
審聽斷工古文詞精楷草與諸生講學諄諄不倦營建文
廟城池書院暨諸祠宇不遺餘力所刻碑記深為士林所重
永清低山寇負隅大成諭以禍福即就撫分命墾地耕種
荒萊盡闢悉為良民大成喜更名其地曰歸化時各峒尚多
盜大成以次蕩平之四境獲安嘗微服夜出巡察街市聞酒
肆人稱其清因刻楹帖廳事云本無可貪贏得虛名清似水
未能免俗誰云雅望重如山蓋紀實也蒞任十載士民愛戴
比去攀轅者至越境云

據龍門志修

徐步汀江西貴溪人舉人道光二年代理龍門縣廉惠勤敏
發摘如神民有以壻貧悔婚致訟者即日傳男女至命就廳
事成親出采繪白金以賜慰遣之觀者如堵闔邑稱快視事

三月去迄今民猶謳思不置據龍門志修

喬應庚字西垣陝西渭南人慷慨有膽畧由監生官粵東鹽場以軍功升用知縣加知州銜戴藍翎咸豐元年題補龍門縣二年八月履任時從化長甯賊甚猖獗輒竄入縣境應庚募勇召兵防堵不遺餘力四年閏七月藍漢平陵賊起招合土匪及東莞增城各股匪萬數環攻縣城應庚設備完固激勵守城壯勇轟斃賊匪無算親然大礮火焚其髯弗恤也二十八日天將曉賊乘大風雨陷城應庚服毒自盡其繼妻郭氏孫女慶姑婢女荷花俱殉難事

聞郵廕有加邑人建祠祀之據采訪冊修

朱燮字子和安徽休甯人道光戊子舉人咸豐四年閏七月紅巾賊陷龍門城令尉皆殉大吏知其才委權龍門縣事九

月燮與紳士李柱蘭等在省城募勇而上比至增江踞城賊已先遁時省城未解嚴藍漢平陵賊匪尙眾燮撫難民郵死事練鄉兵先後獲賊渠陳炳等誅之五年七月募潮勇三百率同士勇攻破藍漢山賊巢盡擒賊首高六等就地正法闔境悉平檢閱新修縣志板片大半尙完好亟出俸金屬李柱蘭補刻以還舊觀六年冬卸任邑人攀留不絕於道其後宰南海牧南雄皆有遺愛云全上

謝鳴皋號鶴林高明舉人道光元年任龍門教諭方嚴正直面斥人過與新進弟子員相見不索執贄禮工古文訓諸生循循不倦其可造就者加意栽培重修學宮尤爲出力八年卒於官據龍門志修

楊宣字雨薌江蘇丹徒監生以巡檢發粵補用咸豐四年五

月署龍門典史事未幾省城戒嚴鄰匪四起迭犯縣城宣隨縣令喬應庚晝夜登陴防守城陷時被賊戕害甚慘磨龔如例附祀喬應庚專祠據采訪冊修

董日烱字函蔡慈谿人以諸生從征在尙可喜幕中所謀畫多中要害委知增城時巨寇肆逆日烱至鸚鵡壘值賊遮道不能進諭以禍福皆散去乃召父老詢之知徵調差徭爲患於是議立爬平法夙弊頓清民無不均之嘆邑素苦盜日烱出片紙諭之其素負固跳梁者皆接踵投見遵約束境內稱平邑常有虎患日烱誓於神患遂寢後有爲虎所噬者皆盜賊也其事尤奇據增城志修

冉存異字平川四川南充人康熙二十七年以舉人任增城縣操守廉潔遇事明敏邑當積玩之後諸務廢弛舊賦積逋

者至十年治者難之存異設的名之法卽兄弟亦不得相假借其急公者賞而懲其頑戶不數年積逋遂清時總督以私販充壅鹽引檄銷甚急存異每鄉舉一人曰鄉長勸諭之而民果不食私又每都舉一人曰都長查詰良莠而閭井肅清上官交章保薦行取入京據增城志修

邵鳳起嘉興舉人康熙五十九年任增城縣政事鉅細悉手自裁決日給惟蔬糲振興文教邑加學額鳳起所請也以年老告歸士民思之據張府志修

沈澄字體元號鷺峯浙之山陰人也以貢生知增城縣性英敏強記五官並用手判口答無所遺失增邑田畝自萬厯時清丈已受其害明季屢經兵燹民多逃亡田畝荒蕪殆盡迨國初稍稍復業隱匿佔諸弊皆作富者享無稅之田貧者

輸無田之稅以是課數不登逋負日積澄乃請於上官募書算弓手先令各都按畝鱗丈然後履畝抽丈既丈之後立柳條歸戶冊計畝以科糧稅之浮於田者豁之其田浮於稅者亦第益其稅而不奪其田要於下無虛田上無虛稅而止不以溢額為功由是民業得世守也當清丈時既夙駕民或告曰有虎或告曰暑雨久從者病矣澄皆不為之止凡所召募以及飲食楮筆一切費絲髮不以累民故澄治增十三年修學修諸壇壝及城垣益大石崗汛設立各義學百廢皆舉而清丈功為最大後陞理錫同知歷廣州府知府至雷瓊兵備道澄在增有清田集二卷今其書尚存嘉慶二十五年邑紳士議請奉祀名宦據增城志修

管一清字配甯號穆軒江南江都人由翰林宰增城縣有文

武才時乾隆十七年東莞王亮臣聚眾良峯謀不軌將詐報

命案給縣官到驗殺之以起事一清廉得其狀飛報上憲引

重兵駐城不兩旬擒獲亮臣等付法縣境以甯章學宮修邑

志建祠以報有功建書院以課士厥績亦不一焉據增城志修

圖爾兵阿乾隆癸未署增城未蒞任先至偵察村庄墟鎮無

不遍歷週知民情洞悉利弊時有生員混名黃老虎專務詞

訟武斷鄉曲兵阿撫其惡迹詳禡其衿又有監生阮某專事

聚賭博大開白鴿票廠遠近赴賭者日百數人兵阿執之治

以徒罪人心大悅蒞事三月境內肅然惜不久代去然澤溥

矣據增城志修

傅其英福建安溪人由拔貢知增城縣慈惠明決邑有弟訟

兄匿產者歷久不決其兄乃武生英臨審先杖其弟乃謂其

兄曰汝弟訟兄業責之汝身列膠庠不知果有欺匿否所分產果公否曰無欺匿分皆公曰公則易矣以汝所分者與弟易之爭息矣時兄支吾不遵乃厲聲曰汝不畏法耶瞞幼匿產孝友兩闕矜可禡矣兄懼願聽判乃從公斷之案遂結又有以建廟訟者莫知其惑於風水到勘曰謂兩造曰是地不利吾解青烏術當為汝等另擇乃指山僻兩無礙處使遷之爭遂息邑故事科歲新進諸生各應繳銀兩補解者棚之費是歲新進多貧英代繳之且於縣考試時設法均派以備解費遂定為例士甚便之其處事明通類多如此任未三年以

丁艱去

據增城志修

毛圻山東歷城人乾隆四十五年以舉人任增城縣吏治精明禮賢育士後調南海大計卓異例陞直隸州任以南邑案

牘繁冗暫留聽斷手批口判日無甯晷勞苦染疾遂不起人

咸惜之

據增城志修

張元愷字廷萃號一峯漢軍籍舉人居官廉靜一清如水起居服食有貧士所不堪者署增城任不久而去人咸惜之上全劉毓琇安徽亳州人由南雄通判兩署增城清廉勤慎治獄明允丁巳大水捐俸賑恤知府朱棟以其貧助之金牛都瑞山義學廢壞倡士人重修且復其租業時撫軍陳簡亭有知人鑑亟賞其廉能欲遷擢之以去任未果兩署事不及一載而深得士民心山僻野老咸慕其仁各以土物獻及去餞送載道皆以不得久留為恨云據增城志修

荆塏字朗公直隸安肅人以進士署增城寬厚廉靜政簡刑清不事紛更四民安堵修復菊坡亭又修鳴皋書院著有勞

績大計卓異特調高要陞嘉應州甫到任而卒據增城志修

王啟宏字伊駿瓊州樂會人歲貢生居家孝友務篤行邑里

化之有王彥方風康熙二十五年任增城訓導立教先躬行

次及文藝月課論經義發人所未發却貧士脩脯且助膏火

焉以渡海風波險惡不能迎養朔望必具衣冠南向拜適資

恩詔歸瓊母子依依不捨回署遂申請終養紳士詩歌贈行

盈帙典試侍郎錢三錫序之服闋補陽春子時炯從宦來增

與庠士多所切劘領庚午鄉薦令定襄孫元圻兩任永安教

諭與增士皆戀敦世誼焉據增城志修

李上漢字雲麓宋忠簡公李昂英裔孫康熙三十五年以拔

貢生任增城教諭造士有方進諸生課文藝親加甲乙謝絕

脩脯即遇歲科試督學使者臨部皆自給薪水未嘗受一錢

與邑令沈澄建鳴皋義學鳩工庀材皆身任勞勩捐月俸不

足則私橐繼焉至今樂育有所頌沈公者兼頌上漢之功於

不衰在任十八年學使者皆禮重之癸巳典試鄒贈以詩有

化雨春風得鄭虔之句以內艱去服闋補英德教諭據增城志修

閻廷弼山西人授增城縣典史攜一僕來赴任典史之職故

冗猥任之者無遠志多不自愛執方寸赫蹠與里民相錙銖

米麥雞鶩之類雜取無所擇而廷弼獨介甚謝請問者革一

切陋規每公事畢書役皆散署中常虛無人則衣敝衣啖麤

食挾書吟詠若自得者嘗奉差給道路費有所餘則還之曰

上官焉可欺也畜一坐馬死哭而瘞之嗣後多徒步又嘗買

瓜菰縷之以少米煮為糜充食知縣魏綰聞而憐之曰何自

苦至此以私米二斛遺之受其半還其半又遺之衣裳兩襲

則受衣還其裘歷任四年始終如一節卒之日知縣魏綰哭之哀為治喪焉士民相率哭於市巷不相杵者累月云

據增城志

高猶寵字飛溟號拾煩順德人由肇慶學拔貢雍正九年授增城教諭至即集諸生講經義一以明之震川萊峯為歸明年諸生請兼書院山長益大暢其說間或有所作示諸生必矩矱先民學者蒸蒸相慕效也粵中諸人士爭執羔雁走其門得其指授多捷去為人平易暇時偕諸生嘯咏有吟風弄月之趣在任七年卒於官其遺教緒論至今學者守之有文集行世

據增城志修

蔣觀昌字載文號新堂廣西全州人康熙丁酉舉人乾隆六年授增城縣勸民孝弟力田睦族安分而自守甚介其聽訟

無大小必親自剖晰不委其屬惠愛之情如慈母之撫其子在任二載卒於署後以庫項未楚其子貧甚不能歸寄棺蕭

寺者累年

據增城志修

林朝開鎮平人由恩貢乾隆三年任增城教諭性耿介而接物謙和勗諸生必以義有諸生以贄見聞其貧還之日坐小齋敝衣布履齋中無僮僕止一子供使令所得俸有餘則以賙諸寒士及其鄉戚留增而不能度日者履任五年以年老休致不能辦歸裝同城官及邑諸生皆醵金助之

據增城志修

余啓昇潮州澄海人乾隆四十四年以歲貢任增城訓導學粹品純課士先器識而後文藝居官十餘載惟蔬糲自給科歲試於諸生脩脯不較多寡同事有不如意者未嘗稍形諸色居八袞開一邑紳躋堂稱祝解組日餞送不舍流風餘韻

至今士林稱道

據增城志修

王庭祐江南江陰人由行伍任增城左營守備為人嚴正明介負郭禾麥向受營馬踐擾祐至嚴戒縱馬害稼其不悛者笞之時市肆擇用官錢營中有以私錢襍餉錢欺壓市肆者祐聞之諭市人曰每兵月用餉錢不得逾百濫者許扭稟市賴以安兵與民鬪必先責兵子某充本營馬兵遇有過杖至百軍政肅然恩威並濟兵無怨之者陞直隸懷柔都司啓行日遠近饋贖送至數百里依依不舍焉

據增城志修

劉象震霍邱人順治七年知新會縣時盜陳德貫作亂象震請兵擒滅之歲飢行糜粥食民婦孺不能來者計口給米多所存活十一年春擢西安同知已辦裝值西逆犯城遂協力守禦八月圍解乃去

據大清一統志修

龍之繩公安舉人康熙三年知新會縣時再定邊界人民流離之繩入境值餘禾棲畝即請聽民刈穫窮黎少蘇比視事惟務休息常勸訟者曰吾與爾等生長干戈幸存性命百念俱當灰冷何暇復競強弱偶以催科笞一里甲退即榜門自責人皆感泣甫三月以疾去百姓送之哭失聲云

據大清一統志郝

通志修

蘇文耀直隸人康熙五年知新會縣性正直能愛民不畏強禦境內肅然催科不事鞭撲民皆樂輸時大軍數出勦賊文耀殫心竭力常以身翼蔽小民民甚德之以逸盜論罷卒於邑寓百姓哭弔者以千數

據張府志修

顧嗣協字迂客江南長洲人康熙四十六年由貢生出宰新會誓神而後入境邑襟山帶海號稱難泊嗣協因俗成化薄

賦輕徭清夙弊革濫征民安其簡間有訟者不羈候日集鞠之至誠披示民以不欺明儒陳獻章祠在白沙故里日久頽落嗣協新之兼鐫其集以粵板字多譌命弟翰林嗣立僱江南良匠開雕庚寅自厓門歸遘疾不起著有漪園近草歿後

祀名宦

據郝通志修

魏標號麟翁江南輝縣歲貢康熙五十一年由上蔡教諭陞新會知縣甫抵任即聚父老子弟曰吾之來牧於茲即而輩父母也凡而疾苦痾瘵吾當燠咻之凡俗之利害吾當汰之與之否者上負吾君下負吾身內負吾心矣未幾革陋規勸耕忙恤榨糖嚴保甲絕苞苴尤明於決訟民無冤者歡聲溢於遐邇五十二年歲大稔飢民鼓變標籌畫分守要害發粟平糶捐俸勸民民變頓止五十五年四月旱民情洶洶比戶

焚香虔禱弗應標聞之自省亟歸詣壇自祈自咎雨立至民益大歡初標之來也不攜家室姻婭曰毋以是為我累故得

遂其清操云

據新會志修

王植直隸深澤人乾隆元年以進士知新會縣治事周密臨民慈愛凡判詞悉當情理仁人之言見者動容故訟平息嘗自修邑乘督濬邑城內河經年乃竣復濬外河甫興工適調署香山接任汪宗禮周懷濟繼其役於是內外舟行利涉皆植有以先之也以經學課士著岡州課錄一卷

據新會志修

周懷濟鎮江溧陽人乾隆十六年以進士知新會縣政尙勤敏臨民慈愛前此陳案疊積民多苦之比任事審決無虛日不逾年案牘頓清民感其勞相戒非大事不敢控瀆幾於無訟嘗書額於堂曰勤以補拙迹其臨事能不負所書

據新會志修

張甄陶字希周閩縣人

按本籍福清移居閩縣

總角時即潛心經義有

國士之目乾隆元年閩撫盧倬以博學鴻詞薦不遇十年成進士自編修改知縣十五年署香山縣能以文學飭吏治十六年改授新會甫到任作祭城隍文自誓甚嚴及二親就養甄陶匍伏道傍俟輿過而後步從歸署邑民嘖嘖稱孝催科簽票尤慎民無差擾咸為樂輸體素弱嘗扶病治獄其父慮其性急令手著金釧以當佩章每決杖囚徒偶撫手釧輒從容再鞠顏遽和霽民莫測也重文教建書院設學規撥田以給膏火置書以資課讀月課必親臨與諸生童論文講藝諄諄如父兄又於城西築養濟院以居瞽者歲給糧米至今賴之

據新會志修

袁名器湖南興甯人乾隆三十三年由舉人知新會縣勤於

民事不拘放告日期有訟者至立為判決不及則繼以燭不半載舊案一清折獄平恕訟者無怨詞且有自知理曲請受責者名器婉諭免之一時戴若神明愛如父母嘗值大風雨獄牆倒塌囚犯皆素沐其惠故無一逃逸解任日民懇切攀留哭聲載道後任海安聞新會歲飢猶飭米商運糶民賴以蘇迄今謳思不置

據新會志修

陳兆熙字夢魚臨桂人相國宏謀曾孫嘉慶四年由舉人知新會縣性廉惠初履任凡一切陋規悉除糧米蠲省撫民甚摯每審訊輒和顏婉語曰若輩無大冤抑各勤職業守分安良勿妄履公庭以是民多感激每宵暇巡視衢巷見弗遵軌道者即諄諄垂諭焉

據新會志修

沈寶善字石樓福建詔安人嘉慶十二年十二月由舉人署

縣事性寬仁服食樸儉操土音與民款語如家人父子然嚴於治差役凡奉公事出者必度鄉之遐邇硃判工食役弗擾民十三年正月署事期滿將去任紳士籲留未得命時洋賊張保劫掠諸鄉寶善佩雙劍乘竹輿日奔視村堡規畫形勢令民設礮臺水柵以禦之嘗至厓門幾為賊獲十四年三月賊屢乘潮入沿濬口寶善親督兵士於西整力禦之或勸稍退寶善厲聲曰城內外數萬生靈所關惟我一人我稍却大事去矣以是兵益感奮悉力拒之賊卒不得逞而去江門外海諸地保障之力尤鉅外海人尸祝之四月尙書百齡督兩廣紳士復上書請留遂復任至是益釐積弊鉏強扶弱仁聲遠播十六年九月解任民章皇如失恃怙自邑城至江門外海天河士民香酒送者絡繹弗絕多泣下者寶善亦泫然揮

涕皆飲少許醉弗勝步云

莫雲漢季秋沈邑侯寶善入觀詩並序侯乾隆壬子舉人嘉慶丁卯

自西甯來宰新會數月間鄉邑俱書官清民樂四字己巳六月二十日洋盜入寇逼近郊郭侯躬率差役鄉勇捍禦朝夕弗懈乃遁去至辛未九月侯以奉委解餉入覲走送三日然後出境予至五十年來盛事僅覲詩以紀之重城填擁走兒曹酒酌離亭淚染袍臨事孤身能禦侮趨朝萬里不辭勞閒吟石舫清風遠候顧嘉會江樓古誼高繡丁為解倒懸功倍昔漫因歌管笑牛

據新會志修

陳應聘號先覺道光癸巳進士咸豐初來令新會當四年時何六已破東莞省城亦戒嚴應聘於六月初一日開設岡州公局籌兵議餉二十八日會營弁各紳為壇北較場陳兵誓眾七月初八土賊陳松年呂萃晉據江門作亂時局紳多異議應聘獨與舉人何瑄意合遂以守城事委之分派各人守城至十五日賊大至應聘親自督戰礮斃執旗賊目追斬十餘級賊艘由東河入者并擊走之而賊謀知城中無備圍不

解至月盡而守城之物已絀乃開倉平糶貧者至薰鼠雜草根而食無變志者八月廿六日夜賊用火船逕犯水閣幸為我軍擊退眾心始定先是請援之書十三四上而援兵無耗乃遣刑幕唐廷楨親往而省城兵大勝於燕塘東道始通於是以黃彬黃顯各領水陸軍來援賊大敗城圍解又復聚於江門均經官兵擊退九月十二日賊復陷外海亦擊走之十一月初一日守備吳連陞敗賊於鶴山之瓦窰十一日遂堵其巢二十日吳連陞復敗於白石人心大震應聘乃親駐江門擊賊敗之正月二月賊復擾荷塘之蟠步乃大集兵勇於四月初一日再勦鶴山賊於沙坪賊大敗紛紛散走我軍追殺幾盡殲焉而松年萃晉均為局勇捉獲正法新會平邑人建生祠祀之後遷韶州府據采訪冊修

任光遠陝西人由歲貢順治十八年任新會縣丞賦性質樸廉靜寡營接物牧民常存仁恕公服外俱用布素嘗自謂造物惡盈滿則招損積俸過百輒自幸曰藐茲一丞得此足矣遂賦歸來其不貪位慕祿如此據金府志修

羅俊字承彥泰和人進士景泰間御史以言事謫新會縣典史日與諸生講解文字而已凡見童子質美者必令向學或遣吏邀之無事則遊山飲酒于于然不矜其為謫宦也性剛不容人過人亦多憚之據黃通志修

南海李徵霽分纂

番禺周熾皋初校

番禺史悠履再校

南海顏以湘三校

番禺史悠泰四校

廣州府志卷一百九終

廣州府志卷一百十

宦績七

張令憲

邵廷儀

沈蘭

姚啓聖

勞可式

余慶錫

魯遐齡

張汝霖

暴煜

申良翰

彭科

孟永棻

彭翥

堯茂德

許乃來

彭昭麟

馬德滋

馮晉恩

邱才穎

李魁元

廣州府志卷一百十

宦績七

丁觀國

沈蓮

石娥嘯

李殿華

陳元濬

冀元亨

沈大耀

涂瑗

劉省三

白色先

洪名香

曾長齡

以上香山

陳億

蘇媚

樊翰

鄭玫

顧之珽

汪鼎金

沈百齡

侯學詩

王元梁

李再可

任荃

沈亨惠

鄭其祥

車廷猷

王德英

范郇

趙之英

馬國才

以上三水

宜思讓

姜朝俊

孫偉

李瑞麟

詹昊

王暘

江涵暎

張文化

王瀉修

李延福

楊德懿

洪惠方

王言

以上新甯

王文燦

劉士驥

陳哲

張哲

王玠

饒應泰

趙榮

劉師陸

文晟

楊砥柱

程兆桂

馬映階

顏子仁

陳宏績

葉重光

沈堃

陳耀

章式成

以上清遠

丁棠發

金啓貞

唐茗時

張文煜

李君柱

馬以懋

李可成

張明達

安定枚

靳文謨

段獻生

何夢篆

李文藻

吳沂

李大根

凌相旌

黃衮裳

曾典學

許光岳

張國勳

尹震

蔡昶

楊進忠

林端

以上新安

王永名

施允中

王敏

宋鎬

王壑

崦開發

王廷柏

狄尙綱

狄廷熊

陳先聲

梁應乾

簡攜魁

徐德祥 以上花縣

國朝

張令憲字胥游江南無錫人由貢生順治七年從軍入粵八年任香山時郡邑初定粟米芻蕘之供倍昔令憲屬邑父老告曰徵輸急矣顧茲殘黎吾不忍迫也盡完而課罔罹於法民感之壬辰歲歉賊梁子直等率饑民直抵城下蟻隊而入城破令憲罵曰吾與城存亡身死分也顧其子曰死親孝也遂父子遇害事

聞贈太僕卿祀名宦無子兄子達廕補浮梁令據郝通志修

邵廷儀咸甯人順治中舉於鄉授清澗教諭遷靖遠衛教授

王輔臣叛偽檄促各官銷印廷儀獨懷印以死自誓事平擢

香山知縣有善政據大清一統志修

沈蘭德清人順治中知香山縣時兵荒後貧富交困蘭加意撫循嚴汰供應差費禁戢悍兵市易流棍土豪一時歛迹士民始有生意每朔望後一日延紳士講學於堂蒞任三年頌聲日起以強項去職邑民思之據郝通志修

姚啓聖字熙止會稽人奉天籍中特科舉人康熙三年知香山縣性沉毅有文武才香山地瀕海盜賊出沒不常啓聖聞警不介馬而馳士卒奮勇爭先賊皆挫衄去值再遷西北諸鄉界鄉民挈妻孥號於路督遷之營弁猶恣掠啓聖挾刃前曰是皆吾赤子也顛連至此尙忍然耶弁感之悉還所掠暇則循行阡陌勸課農桑去官日士民涕泣奔送踰境旋以征臺灣功陞閩浙總督祀邑名宦據香山志修

勞可式山東陽信人康熙二十七年以舉人知香山縣縣自

清丈後未及歸圖虛稅尚為民累可式至清釐稅畝圖籍井然尤明察善斷豪猾不敢逞有嚇索者立置之法善類保全三載以政最擢戶部主事

據香山志修

余慶錫直隸長垣人康熙六十一年以進士知香山縣慈惠廉明杜苞苴陋規盡滌聽訟開誠勸諭折兩造以片言蒲鞭示辱政簡刑清惟以移易風俗為務有為賊所污者力白其事於上憲獲滯雪焉

上全

曾遐齡會稽人雍正十年以進士知香山縣明敏有幹才理繁劇裕如也邑故好訟遐齡至摘伏發奸斷決如流民多畏服邑東竹山洲素為萑苻藪遐齡偵訪親履其地不旬日弋獲殆盡民賴以安捐俸修櫺星門建尊經閣葺書院延名宿主講士咸德之去官日民扶老攜幼遮道不忍舍

據張府志修

張汝霖江南宣城人乾隆十一年知香山縣廉介公慎有經世才邑民阮阿珠被探膽者誘至湖洲山割其腹氣未絕其母趨視詢克賊姓名阿珠以龍眼都高姓告母聞之官時方大索採生奸徒上官嚴檄責捕高姓汝霖曰安有殺人而肯告以姓耶密訪五日得其主名一訊而伏蓋奸徒欲嫁禍於高者人稱神明縣南羅婆陂久為強豪改築遏水自利為勘實修復故道藉灌漑者數百頃其他善政不可枚舉擢澳門海防同知番僧以天主教立廟誘眾汝霖密請大吏入告燬其廟私人教者治如律方燬廟令下洋人愾然不服有兵頭者尤桀驁議以武抗汝霖捧檄單騎赴諭之洋人感悟其膽識濟變類如此尋鑄級去猶條陳善後十事憲府嘉其議勒諸石士民謳思不忘

據香山志修

暴煜山西屯留人由順天籍鄉薦令保昌暨連山皆有聲乾隆十三年調香山廉明公正闔境肅然有弟訟兄者薄示懲警復反覆開導皆感泣去增修書院齋舍置膏火田公餘課士多方誘掖成就之性誠慤為政寬嚴有體所在民懷其德調南海去士民踰境趨送上全

申良翰涇陽人康熙十年以舉人知香山縣甫下車即與教官歐陽羽文倡修文廟復九曲水繼修邑志時值兵燹之後良翰綜核地方大勢作形勝一篇於犄角策應得其要領今言邑海防者猶師其意焉十五年撫賊陳器瑜糾合海寇攻邑城乃與副將白色先勒兵守禦待援兵之至邑故多虎患作文牒城隍神驅之虎遂去據香山志修

彭科鎮遠人拔貢生乾隆十六年知香山善俗宜民尤以育

才為務先是闔邑九書院雖經各前令遞置公產而猶未充裕科分撥沙田歸之以為永久計又詢知大黃圃未建鄉塾即親詣其處偕紳士登山擇地卜築於鰲峯之麓顏曰鰲山書院亦撥田一項有奇歲以所入資學徒費諸人士無不感頌建遺愛祠於書院左偏以祀之據香山志修

孟永棻睢州人乾隆辛巳進士三十九年知香山加意民瘼鎮靜廉明時新村劉姓有與庠生張時化爭墳地者理不直陰戕其病父移屍墳所誣時化毆斃獄幾成永棻察傷痕可疑偵訪得實申上官白其冤案乃定其於民毫無枉縱類如此據香山志修

彭翥字竹林雲南蒙化廳人舉人乾隆五十一年由知封川縣調香山捕盜有能名尤善制澳夷夷性桀驁多藐法或以

利陷有司翥馭以嚴會澳夷殺人夷目堅匿兇犯翥親臨檄拘夷目謝病不見又欲屈翥會於夷廟翥曰吾

天朝命吏也夷廟豈辦公地乃張幕設案於通衢盛儀衛召通事及夷目初皆行夷禮不跪翥震怒且呼杖夷目齮鯨通事泥首謝并代夷目哀乞翥杖通事而姑貸夷目遂刻期奉約束以罪人對簿乾隆五十三年海賊號平波大王者率眾為寇制府福康安調水師擒捕飭翥辦軍需將弁懦不獲盜誣翥供械朽鈍制府怒召翥出諸弁密揭示之翥請給精兵二百躬率往討許之乃戎服出哨諸武弁會勦相遇海島中欲緩行翥不聽行百餘里遇盜船二發礮擊殺十數人賊驚遁去翥知賊必聚眾來乃入島約武弁齊出洋翌日賊船八九從上游直犯發礮擊之閉翥知賊以穢物厭勝亟取黑犬

血釁礮礮果發適大軍亦至擊破賊船俘獲七百餘人制府

大悅飛章入奏以功

賜花翎陞瓊州府同知翥工詩著有海天吟中多出海捕盜

時作去後數十年澳夷猶懾其威澳民咸尸祝之

據香山志修

堯茂德四川峩眉人拔貢生嘉慶二年權香山縣事才識明

決上官委訊疑獄輒得其情實性尤愛士嘗課諸生以一日

成三制藝一試帖細加評隲列優等者不數年悉登科第又

率各都紳士重建東山書院士尤感戴不置云

全上

許乃來字菊傳浙江仁和舉人嘉慶四年由海豐縣調知香

山香山西接新會南臨巨洋山海交錯為萑苻藪乃來治之

有循聲七年七月大府聞有拜天地會於沙尾嘴者不知其

處而恭常都有村曰沙尾乃檄左翼鎮總兵黃標率舟師千

人夷其村又委員督之且令乃來曰沙尾村民作匿爾偕往草薙禽獮不盡根株不得止於是村民洶洶流匪張茂剛等乘機怵之輒欲集兵械以拒捕求生爲名乃來故廉明與黃標雅相重謂標曰沙尾村民何敢然乃來竊疑之公舟至南環俟乃來無遽往南環者澳門之南距沙尾村海道數里標曰善乃來則馳書密諭沙尾村民時日已昃請於委員戒輿人期曰質明具肩輿食而行限二日至沙尾村村距縣治百二十里常以一日至乃來令二日者欲偵訪情實且容齎諭人往復也諭至耆士擁而觀曰許父母使來者乎讀其諭曰大府慮匪人爲村毒故欲捕治之無匪何害若有匪除之福也今愚無知敢拒官軍官軍且至本縣念而等脅於匪人遽罹大咎心甚憫焉卽執惡魁以獻本縣爲而等請命不然爲

戮矣則皆感泣以計擒首惡魁張茂剛等越二日乃來與委員至村民老稚數千百人跪迎於路獻其惡魁纍纍溫諭之皆驩呼黃名燦者黃梁都巨匪嘗拜會於洲門乃來前已訪聞大府者也洲門鄰近地曰沙尾嘴濱海曠濶無人迹名燦常與其黨嘯伏其中乃來在道時偵得之報大府曰沙尾嘴非恭常之村實黃梁濱海地也卽密移新會守備曹某又飛咨黃標移所率舟師圍之乃來由沙尾村突往出名燦等不意遂擒六十五人於是沙尾村之事得白改其村名南屏乃來治盜最嚴然不喜株累常曰除盜所以安民多殺何爲初名燦等之橫於黃梁也以睥睨殺人村有富人子必脅與會不從則焚其屋戕其子弟當是時市不安肆晝無行人乃來業知之而未悉其巢穴故不輕發至是圍之并得拜會名籍

著錄數千人曹守備欲盡戮以為功執千餘人猶搆捕未已黃梁居民皆震婦孺哭失聲有欲溺子而自縊者乃來力爭之立釋數百人繫數百人以歸乃來又力辨其脅從盡釋之請大府焚名籍民心乃安是舉也不出旬日大盜盡平恭常黃梁兩鄉之民如獲更生焉未幾惠州有陳爛屐之亂經年事乃定博羅縣幾為墟人由是益頌乃來慎密弭亂之功黃標嘗語人曰菊傳真一縣生佛云八年以迴避調廣西臨桂縣傾城送之贈行詩積數卷既至廣西尋以在香時獲鄰境洋盜十餘人升直隸州知州邑人請祀名宦許乃來將之粵西留別紳士者老詩鳧鳥飛香山已未歲八月七星鎮當中眾流抱城闕其南湧巨觀蓮花插溟渤形勢何殷軫謀詎劇軫轄下車一操刀欲割愁未達父老前致辭民生有淑慝良民勤耕讀保之勝膚髮莠民起萑苻去之如蝮蝎寬猛稱物施勿徒事嗔喝斯言誠龜鑑而我慚鳩拙每思理縣譜深恐玷祖烈所以自勤恁判事寒漏徹承乏逾三載生怕強勞未匪敢憚焦勞備

患貴周悉保甲洵良法千載不可學端藉魁鬪賢比閭嚴糾察馴致俗盡清人夜戶不闔別嫌例他往將與父老別別時春水生父老情意切會當重相見天心憐契濶 據香山志修

彭昭麟字井南四川雙流人由拔貢任南江教諭以軍功陞廣東陽春縣知縣嘉慶九年調香山昭麟有辦賊才初任香山海氛漸熾即令紳民於近城要地建臺柵以為守禦十二年夏賊攻圍磨刀礮臺急守弁幾不支報至時已申夜磨刀距縣城五六十里昭麟檄守備李海熊領舟師守芙蓉沙防賊北入之路自與都司余時高引兵由陸路馳救鼓五下賊不意昭麟猝至懼昭麟發礮擊之碎其船二圍遂解許廷桂者海上驍將也率舟師數千人皆精銳已而覆歿於芙蓉沙賊益熾乘勢欲逼窺縣城副將某怯甚議閉城堅匿昭麟不可獨出禦賊及反城已閉久之而後得入初昭麟將出也召

紳士慷慨語之曰守土官以死殉分也寇深矣昭麟以一身捍之何敢辭萬一不濟父母之邦公等幸竭力為一城保諸衙吏亦愷切誠勉而後行行則僅督民丁及漁戶而已未嘗得一兵隨臺卡卽有兵亦疲不受驅策而昭麟無懼色視賊所在必往擊之賊故畏昭麟能亦少却時十四年秋也冬賊數百艘避風於新安之赤厓角昭麟偵其實卽請兵於提督孫全謀並檄繪船夷船分扼隘口孫全謀軍其西昭麟軍其東為一舉滅賊計賊乘風張帆西出孫全謀麾師船避之昭麟覺率繪船夷船追之不及歸則歛歔語紳士曰虎狼旣縱不復得矣摩厲以須公等慎無怠明年賊受撫海患紆昭麟前後籌辦者五六年嘗捕賊自澳門歸遇賊於芙蓉沙南賊以鈞竹鈎船幾為所得時新會在籍侍衛陳大英同在舟中

射賊船篷落乃免今邑人談往事猶曰非彭父母不畏艱險則城外咫尺地卽不保也後以薦陞登州同知援例以知府用督撫奏留廣東厯署鹽運司運同嘉應州知州著有從征

過嶺嶺南等詩草

據詳事畧采訪冊修

馬德滋字蔗泉廣西全州人進士

嘉慶己未題名碑名德表後改今名

嘉慶十

九年來知香山縣事有才猷性尤好士凡可以嘉惠士林者若橫舍書院雖形家言猶冀其萬一驗無不竭心力為之有洪順章職員鄭齡世僕也齡死圖反其主訟齡子職監廷楓於官不直則乞當路者為言於巡撫右之委候補府某來質其事且檄校官以廷楓戒飭德滋不可刻日同委員集訊縣庭紳民聚觀如堵墻廷楓呈其券信委員詞塞事得平反公憤以伸至今人猶頌不衰

據香山志修

馮晉恩雲南霽益州人道光二年署香山清慎明斷坐堂皇視事其所剖析眾皆帖然百姓以好官稱之提督吳巡海追二層船礮斃其一人餘數十人泗水逃死提軍悉獲之解總督檄下縣擒治餘黨晉恩遣役跡之得其情謁制府白寃狀總督怒謂囚乃提軍親俘令輕信役言並逮役晉恩以去就爭之告南番兩縣代陳情仍不允告之府守復以為言總督乃下府及兩縣鞠始知晉船載家口灣泊多在澳門一帶捕魚有界而逐利忘害時越界而漁巡兵見之傾網攘奪名曰取魚更既取而復苛虐之晉船望兵船即走避因疑為盜或有懸緝之案並勒供認以求免責一府兩縣據情實覆制府一如晉恩言數十人始免駢戮晉恩治官書反覆詳審吏有受賕舞文者皆駁斥姦吏悚伏謂前官馬德滋號聰察然猶

寄耳目於人而晉恩乃先覺在己明睿尤出馬上未幾以憂去任士民語曰馮侯金侯不得久留金名錫鬯浙之桐鄉人先晉恩為令有善政亦不得久於其任者故人並惜之

據香山志

邱才穎字翼廬福建光澤縣人道光八年舉人十五年大挑一等以知縣用分發廣東咸豐二年補高明四年二月調署香山縣慮度時變甫下車訪士和民五月賊起才穎召紳士設公局修守備小欖陷集富戶捐軍需延董事者食於公遇有警自蚤至暮坐公局以待區處鄉民之告警者親見而拊循之武舉某素兇狡比匪眾皆疑之才穎仍使之從事羈縻而伺察之港口之敗北門之人囂然咎董事者聞於局幾內變張溪之人囂然咎督戰者聞於鄉幾內變才穎悉為之解

釋港口上聞之役每戰勝鄉勇爭功才穎皆許以功首每戰勝必厚賞人皆感奮故所嚮摧枯拉朽克奏蕩平體恤民艱民凡以搜獲紅巾解官者才穎虛衷詳鞫有紳老爲之請命者卽省釋農於海濱者概不問故或破流言亦安貼無反側士民捐貲聽自出納才穎惟綜其成有時軍需告匱輒傾所有以濟之他日償弗償亦弗計也將弁不習軍旅官民並乏公儲臨事惟才穎是賴微才穎事未可知矣五年冬省局徵輸繼之六年冬夷人騷擾繼之籌供億策戰守使者晝夜催四境曉瘠不時旰食在任七年刻無甯晷惟六年春孟百姓稱祝歡讌三日焉咸豐六年督撫以其績奏以府同知直隸州知州用

賞戴花翎再以捐輸加知府銜咸豐十年秋九月去官祖饒

之日士民遮道同治三年卒於廣東省城子玉瓚等扶櫬回

籍焉

據香山志修

李魁元湖北竹山人廩貢生乾隆三十五年署香山邑丞性廉明有叔訟其姪求笞之許餽五十金魁元陽許之徐察其事姪理短而惡其叔之用賄也遂却其金而寬其姪罪第訓誠之而已與太學生吳某善暇輒彼此倡和談及公事人以爲相得益彰云

據香山志修

丁觀國宛平人副貢生乾隆五十九年署香山縣丞先是有閩匪屯聚望廈村爲居民害又時擄行人勒贖莫敢誰何觀國廉其情請諸縣捕之匪皆能鬪且眾捕役不敢前觀國手鐵簡先進村民助之執其首惡若干人置之法餘俱逐回閩民賴以安旣去官民尸祝之

全上

沈蓮江蘇江陰人嘉慶十三年以議叙任香山典史有盜砍山松者爲地主所執餽蓮數金乞究治之蓮詢悉其情憫其貧語地主勿治且反其金時海寇勢熾甚嘗逼小隱港蓮督民壯力守礮臺發礮殪其二賊而大環江尾頭諸村復助之賊遂退蓋素行孚人故人皆樂爲用上全

石娥嘯字鐵霽興甯人康熙四十六年以舉人任香山教諭聞邑明經蕭立有衛伯玉風首造其廬又謁黃泰泉祠購其文以志景仰爲文奇宕古峭課士之暇集博雅者校讎古籍講明而切究之戊子應粵西聘分校鄉闈所拔皆知名士首議興修蓮峯學宮卒底於成凡有關風化者亟撰文以表彰之在任十年致仕

李殿華字實廷順德人康熙三十六年由廣甯歲薦任香山

訓導貧士之賢而有文者舉爲里塾師且資以試費諸生修脯概謝絕列尹重之流連款洽而華未嘗干以私任六載因病告歸人士懷之俱全

陳元濬字雄深澄海人乾隆己亥科舉人嘉慶二年司訓香山品端學博訓迪有方每月課諸生必作程文以示準的在任五年以老告歸諸生攀轅祖餞相屬於道咸依依不舍著有致和堂文稿行世據香山志修

冀元亨山西平陸人拔貢生乾隆五十一年攝香山司巡檢時值歲饑櫛都民多菜色元亨屏去輿從偕紳士之好義者徒步勸輸民賴以濟又嘗延集櫛中人士於櫛山書院課較詩文優加獎賞攝篆僅數月人咸頌之據香山志修

沈大耀順天大興人乾隆五十九年任淇澳司巡檢廉而慈

時有叔與姪爭水而毆傷其姪者其姪訟之大耀諭之曰此微傷也且以叔毆姪當忍受何必訟其姪感悟而去故事官市肉率半價大耀必依民價給之後卒於任篋空如洗民爭賻贈喪乃得歸

據香山志修

涂瑗江西新城人例貢嘉慶三年任香山司巡檢性仁厚在任數年不擾一民卸篆後貧不能歸挈眷借寓檀都社倉諸紳士重其為人延主鄉約事後卒於客邸

全上

劉省三字榕庵湖南祥符縣人由供事議叙未入流陞從九品咸豐四年夏四月任香山淇澳司巡檢性質直寡嗜慾嫻技勇賊起團練自以其技教鄉兵聞寇警輒率士卒赴敵不避艱險邱才穎資之以守城事平獎叙六品頂戴藍翎同治三年卒於廣東省城

據香山志修

白色先鑲白旗人康熙十四年任香山協鎮勤於訓練次年五月朔撫賊陳器瑜糾集海寇鍾吉生輩聚船數百圍邑城色先偕縣尹申良翰竭力經營諸守具纖悉畢周已而賊毀東南關廂破張笏澳寨飛礮越城人無固志色先以大義勵兵民為死守計日則巡邏夜懸松光遍照濠外號令嚴明士卒振奮賊不能破復遣人由間道赴省垣請援十一日師集寇遁去城賴以全

據香山志修

洪名香南澳人道光二十四年香山協鎮右營都司護理本鎮副將事冬三合會匪猖獗知縣陸孫鼎不介意賊匪肆擾名香悉營屬捕之四城始稍靖匪目劉照輝等寇濠頭張家邊諸鄉鄉人格殺之沉會匪陳乾生雷勤等於海匪使賊婦女以械鬪斃命誣控竄富家於牘內賴名香親督營兵圍擒

之東鄉始稍靖又力白其誣於縣富家乃免於難遇警報商機密雖大風雪夜亦延諸紳士議數月如一夕事平遷海門參將再署香山協副將仕至廣東水師提督咸豐四年會匪之亂紳士赴虎門請援名香發大礮資捍禦焉五年卒於官

據香山志修

會長齡新安人龔雲騎尉世職同治五年署香山協鎮左營守備故事藩庫支餉皆以紋銀既領之後換洋銀給諸兵紋銀價高以洋換紋者有贏餘向為領餉者所得長齡曰軍興以來藩庫耗竭餉不時給兵饗飧常不繼又從容治裝多攤墊兵艱苦極矣武官雖貧亦不爭此百十數蓋以其贏餘還諸兵告同官皆感其義從之六年減民間糧米銀價縣官吏因之欲減兵米長齡不可與同官白糧道檄止之七年去官

兵士奔走沿途拜送製繖蓋贈行書二營兵姓名於其上誌

弗謏焉據香山志修

陳億福建福清人由生員順治四年隨征委署三水縣未及一載卓有循聲時值水師霍師連犯城與縣丞薛某縣尉林

景祚教諭江南紀同時被害據三水志修

蘇嶠字峩月河南汲縣人康熙八年以進士來尹三水邑當衝津供張絡繹持以鎮靜大差過而民不擾夏稅秋糧皆以時辦捐資葺黉宮興義塾民甚德之邑志修於前明

熙朝開國以來多有沿革嶠輯而新之典章文物燦然具備政成循卓有聲尋以任滿去康熙六十一年崇祀名宦據三水志修

樊翰號奕文河南汝甯府人由舉人康熙戊辰涖三水秉性

淡泊布衣蔬食屏絕脂膏嚴剔積弊暇卽課士文風丕變催輸禁包攬令民自封投納免季金以蘇里役聽訟公平民無守候之累洪水冲基民艱粒食翰捐俸賑濟上司催徵軍糈孔亟具請寬限民以蘇息時有無抵船價奉文行派徵銀六百兩翰不忍民間賠累詳豁不允卽納印綬辭職士民赴上司懇留力辭拂袖而歸百姓如失怙恃崇祀名宦據三水志修

鄭玫字子玉號虛舟閩之龍巖人由孝廉出宰三水康熙四十五年到任三邑地勢當西北兩江之衝水患最甚玫初至河伯肆虐在在阨危單騎四出巡視基圍設法隄防夜分風雨猶屹立河岸經畫區處自是基圍高鞏田廬無恙邑當孔道供馬賦車絡繹不絕民疲於奔命玫力詳上憲禁革徭役之困稍甦往令征輸悉憑糧房卯簿吏役得以相緣為奸上

下相蒙民無勸懲玫內清完欠外別瀆頑吏役之奸以絀而民樂輸將地連山澤嘗多竊寇不可究詰玫設練勇以糾之星羅碁布奸宄一無所容至於一切假命往時視驗有馬蹄錢之名悉屏之其有累及士女者皆為之禁絕尤加意學校

文廟照墻舊建高闊前塘亦長直僉謂不合形勢欲改而新之而百十年來無有能更之者至玫慨然改作是科秋捷者四人青雲橋學右書院復為修建士民思其功德不能忘也立主於學右書院祀之據三水志修

顧之珽浙江仁和人雍正八年以貢任三水莅邑後百廢具舉摘伏尤神西南街向有落地稅民以為累卽為詳免又改設城守衙署以資彈壓邑境肅清士民安堵後以海疆需人調補電白民亦至今思之據三水志修

汪鼎金安徽休甯人乾隆八年以進士知三水卓有政聲居官廉恕尤加意士林嘗深夜微行聞讀書聲琅琅蹟為某某詰旦即召之來獎其勤學厚贈之復撥充公田畝為貧生膏火都人士翕然稱美爭相慕效文教大興迄今科第鵲起僉謂非其力不及此因立祠奉祀以志遺愛云

據三水志修

沈百齡浙江海甯人乾隆十二年令三水有幹濟才至即修文廟及各壇宇以崇祀典整義塾修基隄行賑濟立心行政為民生所利賴者不可更僕數也和衷營弁體恤汛兵邑故衝疲處之裕如焉以才遷電白去之日兵民交口稱頌至今弗衰

據三水志修

侯學詩號葦圃江蘇江甯人乾隆四十六年進士授三水令甫下車謁文廟見殿宇廡垣日就彫剝慨然以捐修為已

任經營備至不日告成鳳岡講席多聘請外省名宿邑人各操土音講授苦不明晰以故肄業者寥寥學詩檢其情即改延本邑孝廉學者稱便居恒勤案牘絕苞苴優禮士林撫恤惇獨一時有召杜之稱尋調新會署通判領辦綱總局時大府以鹽政日疲新設綱商令各邑舉殷戶充之鄰邑士民轄充破產者比比學詩習知地瘠民貧預為咨白故舉充之令不及焉邑民向苦計口派鹽之累呈準豁免本埠引額歸入總局融銷亦其力也後以報最擢肇慶知府丁艱起改江西撫州肆民思其功德并汪侯鼎金合祀之

據三水志修

王元梁號筠窗江西龍南人嘉慶壬戌進士十八年宰三方正廉潔常祿外不名一錢接見士類循循善誘人見之如坐春風中其窳養如此比年童試卷價遞增知其弊為覈定

卷費毋許吏胥需索勒石尊經閣永禁之輿論翕然尋以疾自効去

據三水志修

李再可河南滎陽縣人進士道光元年宰三水政簡刑清愛民好士每逢大比之年集士決科拔其尤贈以科費下鄉詣勘僅帶皂役四名書吏四名不使小民受夫馬之擾糧務不設總催而民輸將恐後無濫賞無濫刑凡有益於國有利於民者知無不為為無不力升調離任時士民攀轅

爭留盈城外去後立祀位於棠蔭祠

據三水志修

任荃號月坡浙江慈溪縣人進士調署三水剛正廉明不受私謁案無留贖囹圄常空耽吟詠著有鴻爪詩集每月月課課士拔其尤者重賞循循然若父兄之訓子弟前大吏所撥沙田以為書院膏伙者向被土人侵佔親詣勘丈明界至檄

令照稅輸租邑城倒塌倡議發修捐俸助費擇邑中老成練達者督理不數月聿觀厥成後以報災稍緩忤大吏告病去職邑人慕其德教延主行臺院講席後二年而歸祀於棠蔭祠

據三水志修

沈亨惠浙江嘉興縣舉人咸豐二年署三水縣事政少煩苛獄無留滯四年賊將攻城城中男女洶洶逃避邑侯自擬必死勸母莊氏匿民間母正色責之曰我母子同受

國恩當與城為存亡何避為邑侯遂以母言遍告同寅兵勇聞者皆感激流涕願効死及探馬回報蘆包賊陳金剛等訂期二十三卯時攻城是時城內兵勇僅二百餘名益以紳士壯勇未滿三百城內軍裝器械均未完備二十三日逆賊蜂擁而來亨惠與城守何雲章分派弁兵守四門易服登城晝

夜巡邏大小礮一齊發放轟斃賊數百名賊遂大隊奔逃城圍立解然彼眾我寡可暫勝未可常勝亨惠日夜憂危而附城村鄉齊出壯勇排列城外以備救援又各鄉紳士知城有足恃賊無能爲入城商辦者日眾有力之家或捐資鑄礮或潛運火藥或接濟柴油值總戎黃曜吉帶東勇三百由清遠回至三水以竹梯渡入城中同心助守遣腹心查奸細得爲賊內應者二人立斬之七月十三日南海順德高要四會清遠鶴山各路賊匪齊泊三水河邊約四五萬亨惠在城上鼓勵兵勇見有斃命者躬親弔恤受傷者手爲撫摩兵民無不感激自七月十四至十九六晝夜斃匪一千餘名傷者無算賊輟攻專用圍困至十月城中火藥柴油俱盡亨惠欲覓死其母責之乃止各紳士知城中危急依舊接濟又大吏給以

軍餉銀三千眾復仗義捐輸人心始安自七月起至正月止彼攻此拒未嘗少挫兵威至五年二月大吏令守備黃鏞紳士歐陽楷由陸路兼程赴援益以鄉民數百內外夾攻賊不測救兵多少一交陣遂望風而逃兵勇乘勢窮追鄉人四路要截殺死及溺死者約二千有餘由是城門大開軍民始有再生之樂其未滿人意者事平後軍需有餘未爲陣亡者建一昭忠祠冒險赴難之紳士請獎僅得虛銜云全上

鄭其祥號愷吉浙江處州府麗水縣人以功貢出身初任江南上海開河道有德聲嗣佐三水清慎愛民邑接西北時患洪潦奉上督修基圍凡一簣之士必親經目雖朝夕勤勞并無德色治北有古廟爲邑風水護日久傾塌共捐修復士民德之兩署縣事與轉運協鹺才能丕著卒於官據三水志修

車廷猷博羅人乾隆五年以副貢司鐸三水與諸生講論經義終日孳孳不倦春秋釋奠廡躬自灑掃陳設俎豆必誠必敬尤淡於財一饘一粥粗糲自甘弟子見不以贊者輒弗問常曰司教將以範人顧於此事爭錙銖乎其廉潔之操都人士無不知者去後卽汪公祠爲粟主以祀之據三水志修

王德英浙江山陰人任三水司巡檢性孤介不計私橐官雖卑志不少貶廨宇場儼民舍居之時解衣付質庫資用困乏宴如也乾隆甲辰夏河伯肆虐聞大路隄基將陷親往督救隄賴以全清塘圍基決復移駐堤上督修之民有餽遺輒峻拒弗納時論多之據三水志修

范郇河南武安人由吏員任三水巡檢爲人公明廉潔邑之十八里界連南海高明往來盜賊出沒靡常知縣鄭政令各

鄉設立練總鄉勇星羅碁布查緝奸宄郇奉行勤謹稽查保

甲單騎往來無間寒暑地方安堵巡司舊有各鄉年例取之

保甲郇一無取詳縣禁革民甚德之據三水志修

趙之英貴州威甯州人乾隆十一年由行伍擢至三水營

都司性溫雅樂與士大夫往還營有作奸犯科者盡法懲創

紀律嚴整一軍肅然而平時嘯喚士卒若子弟以故咸畏

懷之而不怨兵民相安汎哨無事閭閻舟楫咸資捍衛焉據三水志修

馬國才貴陽府人亦以軍校積功歷都司乾隆十九年來任

三水都司爲人誠樸謙下每自稱爲老兵喜讀書簡閱之暇

一卷自怡時趙之英受替未久都人士恒津津道之國才慕

其人益與文士款洽清時坐鎮兵不擾民與之英前後有儒

將風焉據三水志修

宜思讓正白旗人廕生康熙三十二年任新甯申革陋規二

十餘款訓迪邑士置學田以贍膏伙開青雲路培植文運寬

恤下民嚴覈胥吏舉卓異擢隴州知州父老至今思之據阮志

新甯志修

姜朝俊丹陽人康熙五十五年以進士知新甯為政勤慎門

絕苞苴課士論文獎誘善類壬申秋邑城大風雨民居飄蕩

朝俊募船筏以渡為餽粥以食拯救甚眾擢建甯知府去之

日士民祖道數十里據阮通志新甯志修

孫偉壽光人乾隆十九年以進士任新甯明哲剛斷立心子

諒而行政猛厲遇荒有李某甄某被強暴糾黨破門擄掠率

役擒治匪徒屏跡良民獲安據新甯志修

李瑞麟江西人乾隆三十四年進士任新甯廉明勤政案無

留贖到任數月清結舊案不可勝計民愛之如父母調任南

海攀轅載道其德洽人心如此全上

詹昊江西人乾隆三十八年以舉人任新甯湛深經術宏獎

英流試士公正聽訟平允民歌頌之陞任瓊南政聲一如茲

邦焉據新甯志修

王嵩字百華雲南昆明人進士雍正九年由和平調新甯在

任八年實心為政百廢具舉修學纂志禮接士人海晏大隆

尚徭籍也文教未振嵩考取鄧振翼為首卒為醇士尚民由

是問學瓶峯山下有蠻陂頭危石壁立前為錦被萌山地高

廠泉隔不能至田荒不食嵩捐俸鳩工鑿山開渠引泉溉田

千餘畝其子台以監工乘馬墜厓死士人至今思之附祀縣

城西邊遺愛祠內據新甯志修

江涵暎字筆花浙江歸安人以進士出宰會同嘉慶二十一

年調新甯甫下車即以剔奸釐弊重士愛民為己任時甯陽

書院頽圯涵暎捐廉重修每課期自設盤飧與多士分題構

藝手定甲乙重加獎賞雅意造士多所成就南門外河向有

津渡而無橋梁春夏水漲行旅病之涵暎捐廉倡建石橋數

十丈以濟行人涖任五載多有善政據新甯志修

張文化字治南福建連城人進士道光十二年署新甯居官

清慎息訟安民初邑中奸黠與差役相比藉端詐民文化為

之釐革積弊酌定章程旋補饒平去繼之者不果行至許合

乃蕃始勒諸石以垂永久去之日士民攀輿送之據新甯志修

王瀉修順天大興縣人舉人知新甯到任即培養士風甯陽

書院月課外每五日課試帖詩一首關帝廟傾頽日久捐廉

倡修寬嚴並施毫不假手於人衙役畏之至今人猶感之據采

李延福雲南文山縣人進士涖新甯以興學為首務獎勵生

童如授業師然政簡刑清人頌生佛事母至孝邑人愛其廉

明以金祝母壽悉不受不獲已將金倡捐擴修邑屬節孝祠

益延福幼孤賴母成立故念之不忘也後知番禺縣亦著政

聲丁母憂在寓所病故一貧如洗甯邑人合捐數百金送其

子為扶櫬費焉據采訪冊修

楊德懿陝西武功縣人進士知新甯到任數月即聞佛山紅

賊起亂招集邑紳至學宮酌酒誓眾同心拒賊及開平譚亞

壽司徒貞吉等據長沙令其黨余表黃寬過河到荻海余姓

處豎旗紳士余廷潤督勇斫去紅旗網送余表黃寬二人送縣正法德懿復遣武弁協同鄉勇防守荻海失陷退守鯉魚山是時各鄉皆遣勇赴援另選黃李二姓之勇入城守護賊又潛破謝邊鄉義勇黃兆廷謝聖池八名死之至八月大潦賊乘間進攻鯉魚山德懿督鄉勇奮力與戰賊見不利解纜走其不及回船者盡浮水淹斃并奪獲旗幟器械無算賊自是不敢深入德懿焦勞成病不起之日尚聲呼滅賊不已云邑屬無樹紅旗者皆德懿激勵之力也現奉文建祠於邑城外西街署廣海主簿甯坊典史戚士清附祀據采訪冊修洪憲方江蘇陽湖舉人亮吉季子也咸豐四年冬到新甯任辦紅匪善後事頗極周詳五年遇邑屬大饑斗米七百捐廉倡賑親偕紳往廣海莘村一帶有積粟處糴歸在邑城關帝

廟開局平糶一邑賴安六年五月客匪滋亂屢諭客紳不聽

並為文虔禱城隍神詞甚愷惻任後病故停柩佛山邑人在

佛山考試時猶附此說客匪奸謀言之鑿鑿真不愧諍臣之

裔也據采訪冊修

王言安徽懷甯人任廣海主簿客賊既和復亂言奉縣移偕

廣海營千總黃應祥到田稠防壓客賊乘夜潛至公與千總

死之現附祀楊侯祠據采訪冊修

王文燦字蔚然桐城人明末避兵入粵籍蒼梧中康熙癸卯

鄉試任清遠縣有惠政以招叛功當遷官顧以母老告降改

象州學正據廣西通志修

劉士驥汝陽人知清遠縣好獎勸士類有少年為誣害當杖

詢之某秀才子曰若讀書人有家教應不至是卒白之西

門民居失火士驥聞報不及肩輿倉皇出時風勢暴烈不可救情亟因免冠再拜風忽反撲火滅至今人猶傳之據清遠志修

陳哲江甯銅陵舉人雍正十三年任清遠知縣實心實政杜絕苞苴政簡刑清視民如子尤留心學校以邑中科名未振

力為整飾凡有益於學校者靡不殫心竭力捐俸銀一千四

百兩遷建學宮縣署浚城濠修奎光閣迴瀾廟見邑志漫漶

重加修輯三年遷去士民至今頌之據采訪冊修

張哲河南汝陽人康熙三十九年由廩貢任清遠縣有惠政

修復瑞峯書院作育人才縣人德之據采訪冊修

王玠貴州貴筑舉人乾隆十九年任清遠縣惠民愛士二十

年遷學宮於城內縣署故址建奎文閣於對河遷鳳城義學

於文昌宮之後遷瑞峯書院於城北松樹岡士民思之與陳

哲張哲並祀於城東杉岡五夫子祠旁歲久祠圯復祀玠及

陳哲張哲於書院據采訪冊修

饒應泰江西瀘溪人嘉慶三年由舉人選授清遠縣為政持

大綱好栽培士類延名師主書院講席復親自督課一時人

材蔚起蒙識拔者多舉於鄉乾隆初遷學宮於城外後知縣

周紱王玠復遷入城中年久頽廢嘉慶六年應泰倡率紳士

重脩規制宏敞煥然一新據采訪冊修

趙榮字涪溪四川宜賓人道光四年以拔貢選清遠縣前知

縣周誥新改鳳城書院榮抵任籌增書院膏伙遇官課日必

親詣書院與諸生論文如師弟然榮性剛緣事調瓊州會同

縣後與知府某不相能逮省繫獄定讞發軍台道經清遠縣

吏民餽送悉却之據采訪冊修

劉師陸山西洪洞人由翰林改官知縣道光十五年選清遠
縣甫下車即力行保甲擇錄律例中民所易犯者編入門牌
內使民觸目警心縣役百餘過目即能記其姓名無敢冒名
替代勸課士子親為指授力除吏胥積弊民獲安全十六年
調任南海知縣據采訪冊修

文晟江西萍鄉舉人清遠知縣道光十四年縣大水發倉平
糶並捐俸倡率紳民煮粥賑濟全活無算石角基圍破水至
廣州城西門以外幾成澤國請上官發帑並勸富戶發助得
萬餘金以副貢馮獻修董其役輸地以廣基壘石以禦水既
竣易其名曰清平圍餘銀一千有奇貯為修葺之用自是長
隄永固矣據采訪冊修

楊砥柱陝西華陰人道光十七年清遠知縣決獄明允能發

奸摘伏有以刀筆唆訟者惡之尤甚姦宄斂迹據采訪冊修

程兆桂山西渾源州人由廩貢生知清遠縣道光二十八年

佛岡賊鄧南保等擾亂運使徐有壬駐清遠剿辦數月賊平

兆桂再任清遠甲寅七月省城佛山及各路逆賊猝發陳金

缸練四虎巢潤章等陷清遠城林大年偽署知縣改清遠為

中宿兆桂自刎不死避居濱江五年三月邑人破賊復城兆

桂初政藉藉人口復城稍事貨色置濱江賊不辦聲譽頓減

六年冬陳金缸練四虎侯陳帶等擁眾數萬由濱江出困縣

城兆桂仰藥卒妾趙氏先於四年城陷時自戕死縣人悼之

祀於衛西街義勇祠西有

旨賜卹據采訪冊修

馬映階安徽人以進士授清遠知縣潔已愛民不名一錢道

光二十九年賊首胡黃毛五鄧十富等倡亂潞江巡撫葉名琛提督祥麟按察使祁宿藻統兵至映階往來奔走無暇日賊首以次就擒餘黨平

賞戴花翎加同知銜咸豐二年正月清遠廻岐司禾谷嶺妖民李北社謀作亂映階偵知之密選兵勇千人親往破其巢民賴以安咸豐三年調任順德四年各州縣賊起順德縣陷以失守革職貧困不堪順德人感其德餽送資斧七年廣州府知府吳昌壽督兵清遠剿辦陳金缸等八年映階奉委派往潞江辦理撫剿事宜開復原官九年派往濱江辦善後以積勞卒濱江書院據採訪冊修

顏子仁惠州連平州人雍正五年以歲貢官清遠訓導昔時教官到任諸生謁見者多以贊薄則不見子仁鄙之曰師弟

而以利交乎所居齋僅容膝諸生質疑問難者日至子仁指授無倦色常周視學宮稍剝落者即葺之舊有田租七百石為諸生月課膏伙費教諭盡取之子仁不介於懷也諸生咸不平子仁曰吾不忍彰其過也其雅量如此後以老乞休歸諸生餞送江干有揮淚不忍別者據清遠志修

陳宏績嘉應平遠人由拔貢選清遠教諭慷慨有氣節諸生有不率教必正色誨之有以事為人所誣者宏績偵知之必力為白其冤常曰秀才懦弱每為人欺吾為斯人爭血性矣卒於任諸生成為隕涕云全上

葉重光儋州仁溫鄉人雍正初以歲貢任清遠訓導時年七十矣課文講學矻矻不倦諸生以贊來者不計也家故貧不蓄僮僕隨任者惟姪孔盈及病劇謂諸生曰吾家萬里外子

名小誨甫七歲姪又無力必不能以我歸幸葬我而封誌之
或他日猶得附先人之邱隴也及卒惟書數卷而已諸生葬
之於西門岡迄今邑人歲時祭其墓焉上全

沈堃浙江人清遠迴岐司巡檢咸豐四年七月城破為土匪
何深擄捉至城見賊首練四虎不屈赴水死據采訪冊修

陳耀福建侯官人精熟孫吳諸書有智畧由武舉授福泉衛
千總以臺灣功陞湖南沅州中軍守備康熙二十一年調英

清營江防守備整飭軍容壁壘一新號令嚴明奸宄懾服民
賴安堵歷任六載卒於官子義為新安營千總精騎射有父

風值時平不能大展解組後遂入籍清遠孫廷福廷裕於乾
隆丙辰戊午聯捷武闈延及曾元並入文武兩庠元孫兆榮

以軍功任樂昌城守上全

章式成欽州人蔭襲雲騎尉嘉慶二十二年補授清遠右營

守備性方嚴不妄交馭兵丁恩威兼至整肅營伍而不苛刻
蒞任二十年盜賊屏迹後累遷至廣西某鎮總兵據采訪冊修

丁棠發浙江嘉善人由進士康熙三十三年知新安寬惠仁
慈清丁糧均徭役凡有不便於民者悉除之邑向無社學集

紳士創建寶安書院及行取陞任之日闔邑紳耆為立去思
碑至今存南門內入祀名宦據新安志修

金啓貞正白旗人由監生康熙三十九年知新安廉明仁厚
甫下車詢民間疾苦時邑遷復未幾民嗷嗷中澤同戶逋稅

則合族株連啓貞為惻然編定甲戶分立的名有積欠不清
者罪止一人民皆安業又其時河道壅塞水潦大至民傷蕩

析為措理疏導水患悉除於今賴之入祀名宦上全

唐茗時陝西渭南人由進士乾隆九年知新安行已以恭接士以禮待人以寬撫民以惠邑由是大治公暇輒與邑人士

吟咏以文自適入祀名宦上全

張文煜北京人順治三年知新安甫蒞任軫念殘黎安集撫恤卒然際變能不中於害其後被圍城三月多方守禦不少

懈卒以平定愷悌之政勦靖之功嘖嘖口碑矣據新安志修

李君柱湖廣黃陂人順治七年以貢生知新安潔已奉公勞心撫字尤好士被其容接者咸披衷懷若干以事則慄然色

變其公正又如此上全

馬以懋陝西乾州人順治十三年以舉人知新安愷悌成性軫恤民艱時以兵燹田地荒蕪並多混淆民苦虛糧悉為清

出以免賠累雅愛士或公事相接必辨論經典丁酉分考所

得士尤為極盛據新安志修

李可成遼東鉄嶺人號集又由官生康熙九年知新安居心

慈惠守已廉潔來當展界復縣之初哀鴻未集悉心招徠給牛種督耕勸課城池衙署廢圯捐修不累於民所在設防守

險百度經營務以囿衛民而後已督徵錢糧革除積弊故民皆樂輸巨寇李奇等劫掠聞報即率鄉勇官兵盡數擒獲

接待諸生温然和藹而不得干以私蓋慈惠而能斷清慎而

克勤不獨蒸被一邑鄰封皆向慕之據新安志修

張明達號子上奉天府瀋陽人由監生康熙十七年知新安時哀鴻甫集招徠綏又學宮圯廢歷議修建未克底事乃倡

率紳士捐助鳩工數年告竣廟貌復新康熙二十年有清查丁口之令嚴飭胥役無滋擾累時論韙之據新安志修

安定枚號傳巖遼東東甯衛人由鑲紅旗監生康熙二十三年知新安忠勤率屬廉介惠民一切陋規釐革殆盡加意課士獎勵優渥聽訟絕不株連羈繫到卽鞫訊錢糧分限四季投納追呼不事以母艱離任去之日士民感泣如失怙恃焉

據新安志修

靳文謨直隸開州人號淇園康熙二十六年以進士知新安甫下車凡所不便者釐革改正百姓安之勤於政事夙興夜寐如城樓礮臺窩舖百務修舉縣治鼓樓前因颶風倒塌議修未果乃設法捐俸修復如故決獄極速務得其情以節儉澹薄為士民倡古之良吏不是過焉

據新安志修

段巘生湖廣長甯人由進士雍正二年令新安雄於詩文廉敏仁恕在任政簡刑清禮賢下士寶安書院頽廢乃特建文

岡書院勸捐社田七十石以為山長束脩生童膏火雖繼此

資斧日增而經始之謀咸藉首倡焉

全上

何夢篆江南江甯人由進士雍正八年知新安幼而穎悟博極羣書解經宗漢儒著有思無邪詩集文集行世甫下車洞悉民隱凡所不便民者概行釐革首延邑中名士主文岡講席親考課民風丕變邑中稱治保留十二載至今民猶慕之

據新安志修

李文藻山東益都人由進士乾隆三十六年署新安縣事博聞強記雅善文詞手批口答決斷如流摘伏懲奸牢無滯獄下車卽觀風試士其文至今傳誦焉

全上

吳沂直隸滄州人由舉人乾隆四十五年知新安丰裁峻厲不苟於接物取與分明必嚴以律已當時命案株連動經一

載祇取正克其餘概予省釋非真斃命者一驗卽消絕不拘
究癸卯歲修整學宮鳩工庀材經營備至其廉而肅勤而勞
類如此據新安志修

李大根山西榆次人由進士乾隆四十九年知新安潔己奉
公勞心撫字待士以禮徵收不肯苛求時值脩葺學宮凡一
切丹雘之飾勉力籌備丙午丁未邑中饑糜粥賑濟民賴以
存活者甚多後以卓薦陞萬州知州據新安志修

凌相旌惠州府永安人康熙十年以明經任新安訓導淹貫
羣書究心理學不苟言笑月課諸生捐貲款洽勸誡有法鼓
舞不倦諸生多所造就云據新安志修

黃袞裳號慶齋高州府石城人由歲貢康熙二十年任新安
教諭淹博羣書學有原本毅然以師道表率多士嚴考課不

率者輒戒懲之當蒞任時方建立學宮督理不少懈人文宗

匠誠有賴焉據新安志修

曾典學號覺堂瓊州府澄邁人由歲貢康熙二十二年任新
安訓導剛正廉介以古道自守其視世俗浮營淡如也接人
尤循循謙謹時引古義訓督諸生尋常題詠皆至理格言云

據新安志修

許光岳號奕先雷州府徐聞人也康熙二十五年以明經任
新安訓導凡諸生進謁歡然如家人父子又時引古道相策
勵不少寬假其文章卓然自成一家多士胥矜式之云據新安志修

張國勳北直宣府人號葵軒康熙四年以左路總兵移鎮新
安邑人方驚其來也以爲有鎮兵之擾迨至而紀律井然民

若不知有兵又久之而子惠慈藹民且沐浴之而嘆其來之晚也雅意作人念新邑之遷移人多廢學乃捐俸設塾二延師集生童肄業其中月有試季有課親命題衡文厚其餼廩一時人文之盛咸歌棫樸焉又好詩賦善草書從之遊者皆彬彬儒雅士也故去鎮之日挽留者遮道不能前從古武畧之宗而優優文行若此者蓋罕觀焉據新安志修

尹震北京人號伯興康熙五年由將才任新安游擊恂恂有儒者風恬淡廉靜馭卒伍凜然不可犯有以陋規進者則曰吾何取於此尤喜接待文士其閒雅之致莫不嘆為儒將云

上全

蔡昶號仲升京都人由進士康熙十年任新安游擊處已端嚴待物平易尤好與文士款接康熙十一年海寇遁入瀝源

等山提師急剿戮其渠而掃平之海濱寂然不知有兵也上全

楊進忠號龍山遼東義州衛人由行伍康熙二十年任新安

游擊嚴明仁恕自蒞任以來盜賊衰息兵民安堵新邑多故

之後四郊晏如夜戶不閉於進忠有厚賴焉據新安志修

林端號蓮峯閩之泉州惠安人康熙二十七年任游擊奉檄

涖新安恩威並著屹然負長城之望時海疆初展兩院以端

諳練水性委統領沿海鎮營舟師總巡廣屬海面不避艱險

身先士卒調度有方雅好詩書雖軍中未嘗釋卷有輕裘緩

帶之風焉據新安志修

王永名號應五三韓人以勳胄裔縮符知三水康熙二十一

年任下車時有水患新生高豐二圍被決永名即具文申請

優恤其各墟未決而垂危者親履其所督率補救賴以無恙

催科不事鞭撻但以溫言勸諭民自樂輸軫疲困修學校百廢具舉會花山開縣大吏以永名題補至則開山堙谷鑿石填坑先築城垣壇廟祠宇次第興建設防禦盜遺孑獲安招流亡使復其業即從前陷賊者得所衣食皆來歸焉歲歉則設法賑濟死者給以棺槨民無餓殍輕賦役捐穀石四民樂業共慶生成積勞成疾卒百姓攀號如喪考妣康熙四十一年邑人請祀名宦據三水志采訪冊修

施允中號伊傳江南松江府上海縣人懋勉供職剔除冗派相沿均平陋例皆盡革之是時花邑始建戶口多耗允中務為拊循休養生息創建規模以善後學宮工竣於康熙二十四年癸未首舉前縣王永名舉人黃士龍崇祀名宦鄉賢政成解組去民遮道攀留觀者寫攀轅圖以誌慕今西門街尙

有施公祠舊址云據采訪冊修

王敏號又謙為政五年政尙清簡百姓安之據采訪冊修

宋鎬山東青州人進士出身初涖花縣見明倫堂傾圮集紳士講學於儀門隨囑紳士建明倫堂復就步雲書院增建兩廊以居生徒其為政寬嚴相濟務提其綱自書堂聯有三尺嚴霜猛虎毒蛇咸落膽一簾化日深山窮谷也回春之句民以為實錄云全上

王鑿字曉林號百堂徽州府休甯縣人操守清廉勤於教養知花縣山磽土瘠野少積儲為置社倉一在城內一在水西鄉一在魚種潭令民就近輸穀做朱子社倉法散斂以時民樂簡易創立義學隆師獎士公餘誘掖獎勸親若函丈將涖揭陽召王瓚八人告曰余建義學得民溢稅地若干租若干

束脩膏伙已備今以租冊付諸君輩輪流代理義學乃可久
一歸諸官則易廢也其實心為政如此上全

峴開發西蜀人乾隆三十二年任花縣為政清簡廉明倣趙
廣漢設鋸箭受吏民投書發奸摘伏如神出差不敢滋擾閱
嘉慶道光二朝政聲流聞父老猶思慕之不侮鰥寡不畏強
禦是其行政之大畧也上全

王廷柏江陰人乾隆四十三年八月初八日知花縣五年以
嚴明著聽訟應機立決民無拖累行保甲弭盜賊編奇零均
賦役懸鏡城隍廟顏日照瞻前任徐耀祖興修文廟限於基
址廷柏清釐舊址撤去民房侵佔學地者一十八所宮牆巍
煥後奉憲委辦省局適花邑有土豪黃老虎者事發逮黨干
人騷動鄉邑公單騎馳縣盡釋其黨眾置黃老虎於法民心

感服供長生祿位牌於文廟之西福蔭祠廷柏由副貢官教
習工書能文邑中亭臺樓宇聯額幾遍上全

狄尙綱號相圃江蘇溧陽縣人進士嘉慶五年九月二十四
日知花縣五年廉靜而文政尙簡易不擾於民除社倉積弊
銷鐵爐虛餉民益便之有爭訟者令各輸其情得和睦而去
尤以時相道山川考驗星躔築堰通渠培城補脈一時獅嶺
社學巴水文閣次第創建捐廉三百金勸脩義學添置膏伙
田四十畝其作養人才類如此嘉慶四年以前官吏浮收每
石糧銀七兩到任卽行裁減每石收銀五兩民困稍蘇嘉慶
十年七月陞遷去任民皆遮轅奉祿位於花峯書院以時拜

祝上全

狄廷熊字瑞周號雲軒江蘇溧陽縣監生嘉慶二十二年知

花邑三載政尚清簡剔除書差滋擾需索冗弊民安其業搜羅邑中忠孝節義表彰鼓勵開修志館續輯邑志四卷清釐義學租田每年可得租銀四百兩勒石於書院延師興教士安其業後以陞遷去任士民愛戴遮道攀轅供長生祿位牌於花峯書院人皆目為前狄再來比美施王焉上全

陳先聲號惟豫澄海人雍正丁未進士性曠達好古任花縣教職四載樂育人才後調昌化縣教諭士人思之立德教碑上全時乾隆三年也上全

梁應乾字作霖號觀瀾惠州府長甯縣人辛酉舉人原任湖北襄陽府宜城縣有軍功性廉靜改就教職乾隆三十五年七月選授花縣教諭會邑令王廷柏修學宮費鉅應乾籌畫盡善并新兩學衙署獎掖士類出於至誠士風翕然在任十

二年卒於官士人思之祀於福蔭祠上全

簡攜魁號梅峯肇慶新興籍壬午舉人道光二十年任花縣教諭廉靜寡欲教育有方後以告終養回籍士人思之上全徐德祥任花縣城守巡警營鋪愛恤士卒有文士風上全

南海李徵霽分纂 番禺周熾皋初校 番禺史悠履再校
南海顏以湘三校 番禺史悠泰四校

廣州府志卷一百一十終

廣州府志卷一百一十

寓賢

公師隅

陸賈

許靖

虞翻

陳元德

范縝

房融

張九齡

曹松

鍾軾

徐德明

蕭世範

蘇軾

陳顯

黃憲昭

陳照

黃由

徐宗仁

伍珉

譚瑞奇

李喬木

雷復

鄧符吉

徐安國

方宗一

曾伯由

蘇劉義

伍正

文應麟

黃温德

趙必宏

解縉

蕭九郎

莫豪

鄒智

黃暘

李承箕

黃諫

鄭方輿

蕭錦龍

郭宏纘

王士禎

漆世宗

潘耒

沈廷芳

杭世駿

馮敏昌

陳昌齊

李補平

史善長

公師隅粵人越王無疆為楚所敗其子孫遯處江南海上爭為王赧王時有立為王者隅以無疆初避楚居會稽東武有怪山浮來鎮壓其地因名東武山乃往相度南海將依山築南武城以居越王而越王不果遷時三晉惟魏最强越王與魏通好於是使隅復往南海求犀角象齒以獻之久在嶠外乃得諸琛并吳江樓船會稽竹箭獻之魏魏王乃起師送越王往荆棲之沅湘于是南武疆土遂為越貢奉邑稱雄于交趾云

據竹書紀年
黃通志修

陸賈楚人有口辨高帝時尉佗自立于南越使賈賜印為國

越王賈至佗魁結箕踞見之賈因以義說佗佗乃蹶然起謝曰居蠻中久殊失禮義留陸生與飲數月曰越中無足與語至生來令我日聞所未聞遂拜佗為南越王稱臣奉漢約歸報高帝大悅拜賈為大中大夫文帝即位賈復使粵令佗去黃屋稱制令比諸侯世傳賈兩奉使所著有南粵行記紀其其遊覽據漢書本傳

許靖字文休汝南平輿人舉孝廉除銓曹郎與尚書周怱推韓馥等為諸州牧而馥連兵內向討董卓靖懼誅出奔吳越孫策東渡江復走避交州太守士燮厚禮之靖寓南海頗久後劉璋聞其名徵拜廣漢太守昭烈即位策為司徒雖年逾七十接納後進清談不倦諸葛丞相甚重之據蜀志本傳虞翻字仲翔餘姚人少好學負氣年十二客有候其兄不過

翻者追與書曰僕聞琥珀不取腐芥磁石不受曲鍼過而不存不亦宜乎客得書奇之由是見稱孫策辟為功曹待以賓禮嘗以所著易注示孔融答書曰聞延陵之理樂觀吾子之治易乃知東南之美者不獨會稽之竹箭也權嗣位遷騎都尉翻數犯顏諫爭權不悅及為吳王宴末白起行酒翻佯醉伏地權去翻起坐權大怒欲手劍之大司農劉基力諫始免遂徙南海南粵王建德故園即今光孝寺也翻雖處罪放而講學不倦門徒嘗數百人所註論語國語老子皆傳于世嘗曰自恨疎筋骨體不媚犯上獲罪長沒海隅生無可與語死以青蠅為弔客使天下一人知己者足以不恨卒年七十妻子得還子汜字世洪生南海年十六父卒還鄉里後以討扶嚴功拜交州刺史封餘姚侯據吳志本傳裴松之注郭通志修

陳元德獮道縣人今陝西鞏昌府少儻以材勇聞事東晉孝武帝

歷安帝恭帝朝有征伐功孫恩之亂元德同劉牢之奉詔進

討以功多封建國大將軍資善大夫孫恩死其黨盧循復熾

攻陷廣州元德再承命往征功未就值劉裕將遷晉室惠元

德不附己謫晉江刺史裕篡位遂棄官挈妻子遯跡嶺南至

番禺愛浮練山水之勝遂卜居焉今其子孫繁衍科名不絕

據張府志 番禺志修

范縝字子真南鄉舞陰人少有才名齊永明中嘗為行人使

魏歷宜都太守後仕梁武帝與尚書令王亮善談論每譽

亮而鄙謝朓帝怒下廷尉治之滅死徙南海累年徵還拜中

書郎國子博士卒于官據梁書郭通志修

房融河南人聰慧好佛唐武后時以正諫大夫同平章事長

安未嘗知南銓在廣州時值天竺僧般刺密諦三藏持楞嚴

經梵本浮南海而至融就制止光孝寺譯出而筆授之今寺

中有筆授軒云據新唐書楞嚴經序唐詩紀事修

張九齡字子壽父宏愈僑居南海生九齡幼聰敏七歲知屬

文年十三上書于廣州刺史王方慶會張說謫嶺南一見厚

遇之弱冠舉于鄉景龍元年擢進士第二授校書郎開元十

年遷司勳員外郎尋擢中書舍人內供奉改太常少卿出為

冀州刺史以養母求罷改洪州都督徙桂州兼嶺南按察選

補使召為秘書少監集賢院學士擢工部侍郎知制誥轉中

書侍郎以母喪去徵拜中書令封始興伯後以薦周子諒坐

貶荊州長史開元二十八年卒贈荊州大都督諡文獻據唐書本

傳郭通志修

曹松字夢徵舒州人學賈島為詩累試不偶南遊廣州山水勝處必留連累日嘗至西樵山棲遲久之移植顧渚茶于中教其民焙茶至今樵茶甲于南海山民以茶為業者殆萬家復至盧埃石咨問處士陳陶舊跡人因改石為南箕臺云松後北還舉進士年七十餘

據唐詩紀事黃通志修

鍾軾長葛人唐參知機務紹京之八世孫也以佐太祖勲官至防禦使娶相國潘美女開寶三年從美征偽漢劉鋹越明年平之得州六十縣二百四十以功加廣州留守因卜築于古番龍騰遂家焉至今子孫蕃衍

據從化志修

徐德明字安民江西南昌人宋仁宗明道二年任廣南東路總管都監景祐二年五月獠獠作亂寇雷化諸州奉詔督廣兵合桂兵征討有功加防禦使時廣南處服嶺外聲教稍後

中華湖廣之獠溪崗之獠實逼處此閩閩疾苦既無由上聞而官斯土者復誅求不已民困弗堪往往轉徙不常因而激變德明在粵久洞悉其弊一以仁恕行之招徠撫順遐邇獲安以元祐五年卒年七十九子孫家于粵葬德明于東官鷓鴣阮亭子岡後支裔蕃衍析居三縣番禺之夏園東莞之鼓鎮萬江增城之西洲皆其後云

據番禺志修

蕭世範浙江龍泉人

按家譜作吉安泰和人

嘉祐中以進士為南雄推

官郡苦官運世範制小車挽載公私便焉改廣西轉運判官後去官來家于香山

據香山志修

蘇軾字子瞻眉州人紹聖中為章惇所排以兵部尚書謫惠州經南海山川名勝多所題詠如元妙觀則有眾妙堂記千佛塔寺則有手書六榕扁額遊蒲澗海珠靈洲妙高臺俱有

詩邑南徼瀕岡州境有石螺岡軾維舟岡下登陟徘徊吟咏人即其處構亭稱坡亭所製桶巾屏几遠近皆倣之其為人向慕如此今祀于妙高臺軾先居惠四年移瓊州廉州召還卒諡文忠據宋史本傳

陳顯字德明河南固始人元豐中進士歷戶部尚書政和二年因召對力言再用蔡京士民失望帝怒貶知越州遂隱于四明五年召起為宣和殿學士辭不就靖康之亂避地南海因家焉據南海志修

黃憲昭筠州人至順中累官西臺侍御史以直諫馳聲法署會禁漢人南人不得蓄兵器犯者論死乃上疏言天生五材誰能去兵苟以南北異視人人疑懼為變非小忤上意後三年詔安置廣州行至南雄卒子從簡入廣留家南海以保障

功官至宣慰副使據張府志修

陳照華陽人世有明德大觀戊子領鄉薦授廣州清海軍司理心存平恕以寬為治稱平允焉值中原多故初居南雄後遷五羊傳八世至虛白直學擇容奇村居之今為陳氏再遷之祖子孫科名不替其詞曰西蜀流芳故趙東臺有追維本始匾云據張府志修

黃由字居正江南長州人淳熙中進士官天章閣待制吏部侍郎甯宗時知錦州王沈上疏乞置偽學之籍趙汝愚留正周必大王藺為之首朱熹呂祖儉與由等凡五十九人由上言人主不可待天下以黨與不必置籍以示不廣殿中侍御史張巖劾由阿附罷之後出為廣南漕運使遂卜居新會之杜阮鄉為杜阮黃氏始祖據張府志修

徐宗仁永豐人淳祐中進士景炎初為吏部侍郎權禮部尚書扈端宗走海上帝昺即位宗仁從至厓山定行在禮儀其寓新會最久與丞相陸秀夫輩恢復社稷已而帝昺崩于海宗仁及樞密使高桂兵部侍郎茅湘吏部侍郎趙樵翰林學士劉鼎孫等皆死之議者謂大忠祠宜以宗仁諸公配享子孫遂占籍新會焉全上

伍珉梁人宣和六年進士高宗朝官至平章使上柱國因抗疏忤旨謫嶺南第十三將鎮南恩州未幾卒于官其壻尚書李喬木為卜葬于新會德行都十里坪據新甯志修

譚瑞奇字宗吉弋陽人紹興戊辰進士與朱熹同榜授禮部員外後官長史司左長史兼叅軍甯宗朝與呂祖謙上書論趙汝愚之忠朱熹老儒彭龜年舊學李庠老成不當罷之于

外謫廣東以公事至西林長沙鄉山水竹石可愛因卜居焉

後召用而瑞奇卒嘉定間遣使致祭祀據龍門志修

李喬木字楹楚汴梁人丰姿俊偉博學強記善詩文登建炎進士官至銀青光祿大夫兵部尚書廉明忠直朝野推重因抗疏忤權奸謫嶺南適瓊黎叛朝議喬木才猷可托專閫詔

復原職往征平之不安戮一人被俘士女悉還親屬凱旋復命經南恩州卒諭葬州曰官山其子玖領省解奉母伍氏僑居新甯遂占籍焉至今會甯間多其子孫代有表著衣冠稱

盛云據新甯志修

雷復字陽昇河南祥符人父潮翁當甯宗時以進士同知南雄府事按宋志南雄州非府也復少習庭訓長通經術近遵伊洛之學遠探洙泗之源潔身勵行出處不苟當慶元黨禁

以學二程之學者為偽復閉戶不出嘉泰以後黨禁既弛乃
 出應鄉會試由鄉貢登進士第理宗時晉大理寺正卿兼管
 長春殿事以恤刑為心于庶獄有所平反輒為權奸賈似道
 所抑弗克振其才即力求退不許因丁母憂遂來南雄依父
 守制繼丁父憂服闋遂不起隱于南雄沙水村珠璣巷自是
 緘口不言世事子震南景定辛酉解元震龍咸淳丁卯解元
 後遷于廣州新會之古博里按古博今屬開平時咸淳九年癸酉八
 月也終年九十有奇葬于古博里鴨山其後延蔓于文章斗
 洞遂聚族焉據新甯志修

鄧符吉水人宋崇甯間登進士第授承務郎權南路歷官陽
 春令人廣樂邑風土之美卜居挂角山之錦田南海霍暉記
 其事後五世孫自明尚高宗公主子孫世居錦田龍躍頭平

山庄屋村皆其裔也

據張府志修

徐安國字邦甯宋庚寅解元原籍江西為廣東茶鹽提舉慶

元三年東莞大奚山鹽民作亂安國討平之後隱增城塔岡

移居西湖遂為徐姓之祖

據增城志修

方宗一福建莆田人理宗時官龍圖閣學士奉命冊封交趾

夷人向化復命入厓門居郵館卒度宗咸淳元年賜祭葬歸

德鐵鑪坑子孫家焉

據方獻夫序修

曾伯由宗聖裔宋天聖間祖志大自江西遷居邑之歸德伯

由為人卓犖慷慨鄉人信服元季廣州亂東莞何真檄舉義

兵伯由首率鄉兵屬真分守歸德保障有功

據張府志修

蘇劉義荆湖人景定初從呂文德戰鄂州有功轉十官四年

又以守鄂功為吉州刺史劉氏雖出呂氏乃心在王室景炎

新造拜檢校少保某軍節度使殿前指揮司馬兼諸路經制
鎮撫大使廣東西策應大使劉義多智畧遇張世傑用事志
不得展罷諸使殿司帝在井澳元劉深來襲陳宜中如占城
劉義追之不及而返夜泊灣頭天火飛集其舟延燒衆舟幾
盡祥興嗣統進開府儀同三司殿前指揮使崖山兵敗與世
傑斷維奔海世傑死劉義與其子俱脫文天祥謂劉義剛躁
不可近然能服義始終不失大節後爲其下所殺據張府志修

謹案張府志云劉義史稱爲其下所殺而其家乘則
曰劉義字執之家本南海性豪華多才宋季慨然以
社稷爲任寶祐六年由上舍授右迪功郎常熟主簿
遷靈川丞德祐改元詔天下勤王劉義起兵自靈川
入衛其逃歸也變名爲由義云邑里階資與史不同

豈劉義敗後逃隱龍頭堡子孫遂居龍頭其爲丞簿
在寶祐至景定而從文德未可知也廣州志于流寓
今從之

伍正汴人宋末爲翰林典章德祐二年元攻臨安庶官奔散
端宗帝昺幸廣州典章扈從至厓山不去宋亡遂遷居縣之
西鄉文章里後其子孫受元官多顯云據新會志修

文應麟丞相天祥後孫景炎中丞相弟璧來守惠州麟往依
之嘗勸璧建樓櫓積芻蕘以嚴守備璧易其言及元兵至璧
以城降麟哭曰城亡與亡職也奈何墮家聲挈其二子起東
起南遷于邑之東渚遂家焉今其子孫日蕃爲名族據張府志修

黃温德字朝貢其先筠人宋度支員外郎漢卿之後曾祖元
西臺御史憲昭以直諫安置廣州祖從簡從東莞伯何真起

兵稱驍將留家南海以保障功官至宣慰副使父教與宗人定家禮鄉人化之温德年十有四失怙能讀書成儒業事繼母以孝聞母病思食柿且欲致其兄嫂時兵燹後郊野皆荒榛無居人冒星霧走百里往舅家求之邂逅一媪携柿一筐來乃其姪也母食柿而愈人嘖嘖以為難又嘗被執于盜與叔敏爭死按敏洪武癸酉舉人盜義而釋之弱冠英發善謀上書永嘉侯朱亮祖亮祖奇其言留轅門言之平章廖永忠俾長百夫慷慨辭不就永忠怒係諸尺伍由廣州右衛徙隸香山守禦以卒少時有相者見之曰子貌殊奇偉隆準闊頤有德君子也然火色不壽後昆其必興乎卒葬東郭大北山子孫家焉

據香山志修

趙必宿

按南監本宋史宗室世系表作宿

字子清宋封裔王趙元份之十世

孫也原籍福建自閩入粵歷任雙恩淡水海晏矧崗四場鹽

課司大使

按宋無雙恩鹽場矧崗作挫銅掌鹽稅者為監當無鹽課司大使之名

行經矧崗清

溪之濳愛其山水之勝遂卜居焉卒葬潮居都大安村后山

據新甯志修

解縉字大紳吉水人洪武戊辰進士選庶吉士改御史時進

直言無所顧忌永樂初詔備顧問累遷侍講學士與楊榮輩

竝值文淵閣諫征交趾出為廣西參議道經廣東遍遊名勝

嘗至南海西樵山題廖謹讀書處李至剛劾其怨望改交趾

八年奏事南都值車駕北征高煦譖之逮詔獄卒洪熙初官

其子禎期中書舍人

據南海志修

蕭九郎字仁光號和生原籍江西吉安府泰和縣人登永樂

甲午科鄉薦選授惠州府歸善縣教諭任滿來增邑城謁崔

清獻祠路經塘頭村前見其水清山秀遂卜居於此而世家

焉據增城志修

莫豪別字竹山系出唐狀元宣卿後遷恩州那西村為恩州人正德間以廕籍龍驤衛立武功擢錦衣衛正千戶秩武節將軍嘗自慨先世代有魁名矢志遷居為教子地適奉命將兵清遠凱旋便道遂卜居岡州語其子違智曰擇於斯遷於斯白沙餘風高山可仰小子識之違智及身堂列五世郝羅千指後人聚族居於邑城衣冠鼎盛豪有以啟之也據黃清撰莫象

泉行狀修

鄒智字汝愚合州人由進士選庶吉士宏治戊申星變上疏極論陰陽之理欲退萬安劉吉尹直而用王竑韶且曰君子不進小人不退宦官陰主之也疏人不報吉因誣御史湯

鼐妄言朝政并逮智下詔獄議者欲當以大辟刑部侍郎彭

器不肯判乃謫石城吏目都御史秦統檄修書院得居廣州

聞陳獻章講學江門扁舟來訪談論無間時以詩文相叩因

寓居壯哉亭後順德尹吳廷舉智同年進士風節相尚時迎

致之遂往來新順間所在有題詠遺蹟焉據張府志修

黃暘字日泰始興縣清化桃村人任前山寨守備嘉靖時剿

寇陣亡次子萬福殮其衣冠葬於老戶頭山遂遷居香山為

張家邊黃姓始祖據香山志修

李承箕字世卿嘉魚人都御史承鄖之兄大理評事承芳之

弟也成化乙酉舉人有志於聖賢之學宏治元年聞陳獻章

倡道江門挈其子姪從遊獻章甚器重之為築楚雲臺居焉

邑令聘修新志乃入城數旬其餘俱朝夕江門所為詩文奮

迅逸宕類其為人築釣臺黃公山下與兄承芳同隱著有

大匡集

據張府志修

黃諫字廷臣臨洮蘭州人博學多藝工隸篆行草正統壬戌

進士及第第三人授編修天順中出使安南風節凜然好品

泉水論郊畿以玉泉為第一論京城以文華殿東大庖厨井

為第一作京師水記謫廣州通判遨遊白雲蒲澗諸山水亦

評廣州泉井以雞爬井為第一更名為學士泉鐫題名勝多

作八分書廣人多從之遊後召還卒於梅嶺驛舍

據番禺志修

鄭方興字以言閩之興化軍人父日光官至廣南東路轉運

副使遂家增城方興登隆慶癸未進士官國子宣教善訓迪

祭酒任公重之曰使訓士皆如鄭宣教禮樂其可興乎三疏

引年賜緋魚致仕

據增城志修

蕭錦龍江南人僑居香山東城外驍勇善泅康熙十三年海

寇犯城圍攻甚急復悉擄民船布網于海以絕救援時孤城

坐困百姓洶洶龍奮不顧身慨請乞援合為蠟書附龍潛出

水關泅達省未幾救兵至而圍解城賴以安後家于香山

據香山志

修

郭宏纘字梓參福建人順治四年任乳源知縣既而謝事寓

居清遠博物洽聞手不釋卷著述甚富其論志乘相沿之誤

有曰按唐盧肇字子發嘗謫春州而集中誤作青州蓋春而

訛為青也題清遠峽觀音院詩作青州遠峽則又因州名而

妄竄定也馬病詩云塵土卧多毛已暗風霜受盡眼猶明足

為當時佳句乃後訛以已為色猶為光壞盡一篇語意未必

非妄校者之過也生平嗜古處即此足見一斑

據張府志修

王士禎字阮亭山東新城人世所稱漁洋先生者也幼負聖童之目順治辛卯舉于鄉乙未成進士康熙二十三年以少詹事兼翰林院侍講學士祭告南海典禮崇重載筆以從自桑乾河迄扶胥口次其道路經歷爲南來志一卷而番禺屈大均翁山序之至則與翁山及陳元孝胡崙孩程衍祖黎方回諸人流連詩酒敦握手之歡嘗覽光孝寺長壽庵五羊觀諸勝復著廣州游覽小志俱能辨其物產攷其風土搜剔其斷簡殘碑論者謂可比李習之之來南錄歐陽公之于役志云生平以詩名天下仕至刑部尙書其風猷節概卓卓乎有與文章著述表裏者久之坐罷官卽日就道歸葺夫于亭別業不與聞外事後七年辛卯卒年七十八諡文簡據南海志修

漆世忠江西人志氣豪邁英勇超倫年十二遭兵燹家業蕩

然稍長棄儒就賈算屢却撫膺曰大丈夫何堪若此遂遨遊四方抵金臺遇原任江右藩伯姚公子炳坤見如舊歡約曰我苟宦君必翼我康熙三十七年炳坤合于粵東番禺世忠赴約情好彌篤值惠州甲子所海盜曰蔡三十二聚眾萬數劫掠商民軍門殷化行剿之敗績撫軍滿公議招撫而難其人姚語世忠曰茲君脫穎時也薦于撫軍劄以遊擊銜往殷忌之且護前短僅給軍七百人遇盜港口督戰銃子穿世忠坐坐顛世忠墜諸艘未傷復起坐盜眾大駭莫測虛實遂退世忠夜乘小舟抵盜所盜以爲偵欲縛之世忠叱曰我特來者何偵爲盜兵刃交布世忠笑曰我一人耳何怯如是蔡曰將軍不待戰而敢獨至何也世忠曰

天子聖神文武寬裕慈和爾輩皆良民或爲飢寒迫耳今大

憲不遽加大兵特招撫之爾輩改邪歸正悉宥前愆且以綠林豪俠之材轉而為國家干城之寄寵榮當代豈不愈于為盜耶盜壯其雄而信其坦直相顧曰撫我也世忠返蔡如期至撫軍欲赦而官之殷曰盜傷官軍殊死罪且性野而多頑難受繩尺遂殺十二人蔡臨刑呼曰漆某誑我世忠攜酒往奠其尸或阻之世忠曰盜不予欺我幾不免即獲罪無悔焉卒奠而還撫軍勞以千戶固辭曰數竒安之弗敢違天雍正七年老歸鄉里誨子孫濟貧困敦族睦鄰多行善事姚亦于雍正十一年歸浙未幾世忠沒姚大慟手制輓章曰我負故人矣

據番禺志修

謹按阮通志流寓傳作漆恭采訪冊云恭世忠之子通志誤今邑生員啟昆啟祥皆其後也援以更正

潘耒字次耕江南吳江人康熙十八年試博學鴻詞授翰林院檢討崑山顧炎武徐某皆其師也徐沒耒周卹其孫復刻炎武日知錄及詩文集平生精敏敢言無稍遜避同館思之遂落職澤州相國陳廷敬欲薦起之耒曰止止吾分也賦老馬行以謝來遊嶺表成嶺遊集著有遂初堂集

據番禺志修

沈廷芳字椒園浙江仁和人乾隆元年考博學鴻詞二等選翰林散館授編修兩轉監察御史出為山東登萊青道擢河南山東按察使廷芳學詩于查慎行及其弟嗣璫學文于方苞並冲融淳粹稱其為人所著有理學淵源十卷經義考四十卷鑒古錄十六卷文章指南四卷隱拙齋詩集四十卷文集二十卷盟蒙雜著四卷其十三經註疏正字八十卷則嘉善浦鏜同校云乾隆二十二年應巡撫楊鶴聘主羊城粵秀

書院講席明年廣東糧驛道分巡廣州府金烈廣州府知府張嗣衍延修廣州府志在講院開局分類編纂凡十月告竣

成六十卷

據汪中撰行狀采訪冊修

杭世駿號荊浦浙江仁和人家貧力學假書于人窮晝夜讀之父母禁止輒篝燈帳中默誦雍正元年舉人乾隆召試博學鴻詞列一等第五授翰林院編修校勘經史纂修三禮義疏生平著述甚富長于詩古文詞壬申來粵主講粵秀書院與何夢瑤羅元煥鍾獅陳華封諸君子為文字交邑中名勝題詠殆遍嘗有春日偕諸遊侶集六榕寺詩云吟朋連襪破春寒選勝欣遊淨域寬照水白雲橫野席經天斜日轉扶闌莎臺鳥去山花靜藥院春榮佛火殘三度題詩驚長老巡簷重拂蘚痕看可想見其風致矣在講院時曾取杜詩全集點

讀一過故嶺南集遂為道古堂諸集之冠其題陳獨漉遺像

五首悲涼雄壯步武少陵恐非樊榭寶意所能也

據番禺志修

馮敏昌字伯求欽州人乾隆庚寅由拔貢舉鄉試戊戌成進士改庶吉士授編修充甲辰會試同考官大考改官刑部主事乙卯辛酉丁外內艱廬墓六年悼篤至行而兼眾長中外士大夫無不知其名其論詩云詩者心聲也高下抗墜單緩焦殺各有一偏惟天地之中聲流于人心而發于詩有中聲必有元氣詩者元氣所為非一切區區格調之謂能知元氣之鼓萬物此之謂大家故其詩由昌黎山谷上追李杜又穿穴諸家而自闢面目開闢動盪不名一體書法由褚入大令尤精研蘭亭平生遍遊五嶽皆造巔題其崖壁他如匡廬龍門砥柱壺口雷首中條首陽無不徧涉晚年主粵秀講席學

者稱魚山先生著有孟縣志華山小志河陽金石錄羅浮草堂詩鈔師友淵源集嘉慶己巳奉

旨入祀鄉賢

據南海志修

陳昌齊字觀樓海康人賦姿穎絕至性過人乾隆乙酉拔貢庚寅領鄉薦辛卯成進士入翰林充三通四庫館纂修官甲午典試湖北乙未分校禮闈尋擢贊善晉中允乙巳以

廷試三等左遷編修庚戌轉河南道御史補兵科給事中巡視中西二城旋丁外艱服闋改刑科昌齊生長海邦洞悉邊要上疏切言洋匪會匪情形請設法剿捕明年復條陳防海剿盜事宜尋補浙江温處道時海寇蔡牽騷擾閩浙間抵任修戰艦簡軍伍細繪諸洋全圖昕夕披覽瞭如指掌每接見武弁必加意禮待而關報稍有不實輒指斥之雖百里外事

如親覩在浙五年以審案遲延部議鐫級歸里主講粵秀書院論文課士娓娓不倦尤諄諄誨人立品敦行為先學者宗之生平精攷據之學參訂經籍多所辨正輯有經典釋文附錄歷代音韻流變攷楚辭音辨及大戴禮記二十卷淮南子荀子管子呂氏春秋諸書正誤又長于天文算法著天學脞說測天約術二書其詩文則有賜書堂集若干卷嘗修雷州府志海康縣志廣東通志卒年七十有八崇祀粵秀書院先賢堂

據南海志修

李黼平字繡子先世饒平人乾隆乙丑進士翰林院庶吉士乞假南還大吏耳其名聘主越華講院連兩歲戊辰入都散館改用知縣謁選得江蘇昭文洩事一本寬和慈惠為宗獄隨至隨結無苦候者讞案尤不忍用鞭朴公餘即手一編民

聞因有李十五書生之目以虧擲揭參落職繫外臺獄數年歸里後制府阮公延入節署授諸公子經會開學海堂以經史詩賦課士屬爲定甲乙復主東莞寶安書院教育士類文行兼助人咸愛重之卒年六十三著有易刊誤二卷毛詩紬義二十四卷文選異義二卷讀杜韓筆記二卷堪輿六家選註八卷詩四集曰著花菴集八卷吳中集八卷南歸集四卷續集四卷賦二卷制藝四卷據番禺志修

史善長字春林浙江山陰人父積厚游幕來粵善長生十月而孤母王養姑教子以節孝

旌善長倜儻有異才一應童子試不售援例捐知縣選江西餘干縣先是鄱陽湖濱有袁朱二族爭洲而鬪朱氏死十九人告于官主謀者袁梓材捕之不獲朱氏控京師猶不獲善

長到官知府命發兵捕之善長則布衣草屨攜一童乘漁舟抵袁氏村外使童傳呼曰縣官來皆大驚善長曰吾奉府檄捕梓材所以却兵役屏騶從懼苦吾民耳父老相顧感泣願具結立限自往捕善長曰官與民信耳何結爲卽去白知府知府哂之未及期梓材果至與鄱陽知縣馮某會鞫于巡撫署湖洲錯兩邑本官荒無完糧據詢老吏無知者馮某抗言殺人者死據案擬抵洲所屬不必問善長力持不可巡撫爲動容以此案專委善長善長據餘干舊志明末袁族曾納漁課獄遂決兩造皆折服立碑息訟巡撫深器之名大起在任年餘每旦坐堂皇視事竟日不入私室諸生有健訟者激勸之至涕泣悔過修湖隄冒雨監視捐廉增書院膏火親課之歲旱率父老禱雨徒行烈日中夜則焚香長跪隱几假寐吳

嵩梁中翰贈詩云紅日未升朝判牘青天可告夜焚香紀實也民愛戴之縣以大治後坐失察褫職遣戍縣民相率醵金謀納贖叩巡撫轅門乞留俱格于例總督百齡閱兵江右吏民復遮道泣訴百齡因入

覲以

聞未幾

赦歸道出江西餘干民有知者走相告驚喜膜拜善長少貧而好施有討飯孟嘗之目家稍裕親串多待以舉火者友負八萬金無愠色反爲引手鄰有買婢者婢別父哭哀聞之乃急典衣贖歸其父雖遣戍意氣如昔謫而貧者皆周恤之廣東巡檢王暘在戍貧病爲具湯藥又制棺衾以慰之暘死葬之僧寺側捐金付僧使歲時設祭旁有湖南陳知縣墓亦并

祭之刻石寺壁待其子孫訪至者餘干外委與同謫挈以行衣食之至戍屢贈金外委飲博輒盡及釋回負債不能行善長爲償債同行至江西復贈金使歸壽其母廣東肇慶人劉甲在戍娶妻生子遇赦貧不能歸謀鬻妻子亟止之並挈以歸善長之始謫也母年七十餘謂不復相見在戍三年恆思母悲泣及歸事母五年母卒廬于墓服闋擇近墓地築室以居朔望至墓泣拜善長博覽疆記工爲詩不落凡近邁往如其人江西知縣惲敬稱之曰七十二同官詩人第一在烏魯木齊有稱弟子從學詩者所著味根山房詩鈔九卷雜文一卷輪臺雜記二卷東還紀畧一卷年六十三卒子澄翰林院編修著籍番禺

據番禺志修

南海李徵爵分纂

番禺周熾皋初校

番禺史悠履再校

南海顏以湘三校

番禺史悠泰四校

廣州府志卷一百一十一終

